

ESPIRITUHANONG PAGKAON

SA GIKATAKDA NGA PANAHON



Only believe, only believe,
All things are possible, only . . .

Karon, sa ingon-ani na sàb nga paagi:

Now I believe, now I believe,
All things are possible, now I believe;
Now I believe, now I believe,
All things are possible, now I believe.

Magpabilin kita sa pagtindog karon, samtang nakaduko ang atong mga ulo.

Ginoo, hinaut nga dili lamang kini usa ka awit, kondili sa kinahiladman gayud sa among kasingkasing kami nagaawit, “Karon nagatoo na ako!” Ngani ang mga tinun-an miingon usa niadto ka higayon, human nga si Jesus mibuhay og daghang gamhanang mga buhat, sila miingon, “Ginoo, nagatoo na kami karon.”

Si Jesus miingon, “Nagatoo na ba kamo karon?”

² Sila miingon, “Kami nagatoo nga Ikaw nasayod sa tanang mga butang ug wala na kinahanglana nga aduna pa’y tawo nga magatudlo Kanimo.” Busa, Amahan, naamgo namo karong gabhiona nga wala Mo kinahanglana ang among pagpanudlo, kondili ang sa Imo mao’y among gikinahanglan. Busa ginaampo namo nga Imo kaming tudloan kung unsaon pag-ampo, kung unsaon pagkinabuhi, ug kung unsaon pagtoo. Itugot kini, Ginoo, pinaagi niining panerbisyo karong gabhiona. Kung adunay bisan unsa man nga kulang sa amo, ihatag kini kanamo, Ginoo. Amo kining ginapangamuyo sa Ngalan ni Jesus. Amen.

³ Nasayod ko nga daghan kaninyo ang nagatindog na usab karong gabhiona. Ug, dinha sa gawas, aduna ko’y nahinagbo nga mga pundok nga nag-ingon nga dili na kono sila makasulod, ug nga maminaw na lang kono sila sa ilang radyo diha sa nagkalainlaing mga sakyanan. Ug karon paningkamotan natong himoon kini nga madali kutob sa atong mahimo karong gabhiona, sa Dominggo sa gabii, ingon nga mogahin pa kita og pagpang-ampo para sa mga ma’y sakit, magpahigayon og linya sa pagpaampo samtang makapasaka kita og usa dinhi. Tungod ginapahinugod man nato kini nga panerbisyo karong gabhiona alang sa pagpang-ampo sa mga ma’y sakit.

⁴ Ug buot ko nga mapadasig kamo karon sa . . .niining Balaang mga Pulong sa Dios, diha sa Pagtoo, ang Pagtoo sa niini

nga panahon. Ang Pagtoo! Ingon nga gikinahanglan ang dugang pa nga pagtoo kaysa uban pa nga kapanahonan kaniadto, kay gikinahanglan man nga kini’y makapasagaw nga pagtoo, aron nga malalin. Ug busa gitinguha namo nga managpanoo kamo karong gabhiona sa tanan nga inyong nasaksihan, napatalinghugan, ang Pulong nga inyong hingdunggan nga gikawali, ang—ang mga ilhanan ug mga katingalahan nga inyong nasaksihan nga gipamuhat. Buot namo nga inyong tigumon kanang tanan diha sa inyong kasingkasing, ug pamalandungi kana, kung kana’y iya ba sa Dios o dili.

⁵ Sama ra ni Eliseo kaniadto, miingon, “Kung Dios ang Dios, nan alagaran ninyo Siya.” Ug kung si Jesus mao ang sentro sa tanang mga butang para sa Cristohanon, kung ingon-ana nagatoo ko nga angay gyud natong pangbuhian ang tanang uban pang butang ug manghawid Kaniya. Hinumdumi, Siya mao ang Sentro, Siya mao ang Bitoon sa Amihanan, Siya mao ang Pinakabasihanan, Siya mao ang Tinuod. Ug kung Siya mao ang Bitoon sa Amihanan. . . Adunay usa lamang ka butang nga magatudlo ngadto sa bitoon sa amihanan, kana mao ang inyong kompas nga ginagamit ninyo sa paglayag. Ug ang Kompas nga ginapaninguha ko nga inyong gamiton sa paglayag mao ang Pulong, ug ang Pulong kanunay gayud nga nagatudlo ngadto Kaniya.

⁶ Ug mabati nato nga daw sa nagaagi kita sa usa ka grabe nga panahon sa kalisdanan ug mga pagsulay, panagkalibog sa panahon ug kagul-anan taliwala sa mga nasud, ug tanan nang matang sa mga butang nga nagakahitabo, ug usahay daw sa ginalamoy ako, bisan asa ako motan-aw, mora ba’g sa usa ka. . . sa usa ka barko nga anaa sa dagat. Ug ako ang gipiyalan nga magdumala sa maong Sakayan. Ug unsaon man nato sa paghimo niini? Ug ania nagaabot ang usa ka nagakalukot og gabula nga balod, nga gatusan ka pilo ang gidak-on kay sa akong barko. Apan paibabwan nato ang mga niini, ang matag usa. “Kita labaw pa kay sa mga mananaug pinaagi Kaniya.” Ang Kapitan, ang Punoang Kapitan, man ang nagahawid sa pisi sa tumoy sa barko, Siya mao ang magabira niini. Paibabwan ra nato ang matag usa sa mga balod.

⁷ Karon, niining gabhiona, aron madali kita ug makapanguli kamo og sayo. . . Ginapasalamatan tuod namo ang inyong hataas nga mga pagbiyahe, ug uban pa, ug kung unsa nga gikinahanglan ninyong mobiyahe, ug ang sakripisyo nga kinahanglan ninyong himoon. Ug, kita n’yo, nagapahimo kana kanako diin gusto kong motindog ug magpadayon lang sa pagsulti ug buhaton ang tanan nga mahimo ko para tabangan kamo. Mao nga pag ania ako ginapaningkamotan kong ilakip ang tanan nga mahimo ko, aron makatabang alang sa kahigayonan nga aduna kita karon. Dayon kung imong. . . Kung daghan kaayo ang itudlo mo sa mga tawo diha sa usa ra ka higayon dili na nila kana

mahinumduman. Imong—kinahanglan mo lang magtudlo og usa ka butang ug hisgotan kana mismo sa tawo hangtud nga makita nila kana. Ug pagnadawat na nila kana nga bug-os gayud sa kinasuloran sa ilang kasingkasing, kung ingon-ana sila’y . . . dayon lain na usab ang itudlo mo kanila. Hinay-hinay lamang samtang nagapadayon kita.

⁸ Karon, pag-ampo mo ug magmaisogon, ug toohi ninyo karong gabhiona alang sa inyong pagkaayo. Sa tan-aw ko wala ma’y unsa man nga pagduhaduha diha sa inyong hunahuna mahitungod sa panahon nga atong gikapuy-an. Wala ko nagatoo nga aduna pa’y pagduhaduha diha sa inyong hunahuna mahitungod sa kung ang Dios anaa ba gyud sa taliwala sa Iyang katawhan o wala. Nagatoo ako nga kamong tanan nagatoo niana. Ug ako . . . Wala gyu’y pagduhaduha sa akong hunahuna mahitungod niini. Ug ako—ako—nasayod pud ako nga ang mga igsoon ko, ang mga higala ko, ang mga higala ni Cristo, ang mga kaanakan ni—ni Cristo, nagatoo gyud niana.

⁹ Ug nagahatag kini kanako og dakung kalipay nga makita, og pag masayran mo nga aduna ka’y usa ka Mensahe gikan sa Dios ug pag-ihatag mo kini sa mga tawo, ug makita mo ang mga tawo nga ginadawat pud Kana. Dayon mamalandong ka ug moingon, “Salamat Kanim, Amahan.” Oh, grabe nga kalipay kung ingon-ana nga makita ang mga anak nga nanagpangaon sa Tinapay nga gipadala para kanila! Naamgo ba ninyo nga usa kana ka panan-awon daghan nang mga tuig ang milabay, dinhi mismo niining tabernakulo? Tinuod kana, “Ang Tinapay sa Kinabuhi.” Igsoong Neville, nakahinumdum man ka niadto. Gamhanan—gamhanang panahon!

¹⁰ Karon moabli na kita, kung buot n’yong mosunod sa pagbasa o markahan kini, aron lang . . . Wala ko nagatoo nga husto ang pagpahigayon sa panerbisyo kung walay pagbasa sa Pulong sa Dios ug maghatag og pipila ka mga komento, kung kini’y usa man ka panerbisyo sa pagpang-ayo o unsa man nga matang. Nakasabot kitang tanan. Ingon nga wala ma’y mga estranyo sa atong taliwala, sa tan-aw ko. Mao nga nasabtan gyud natong tanan kung unsa ang pagpang-ayo. Dili kini sa bisan unsa nga ginabuhat ni kinsa man alang kanimo; kondili kini mao’y kung unsa ang gibuhat na sa Dios alang kanimo. Mao ra usab sa kaluwasan. Ang bugtong butang, mao, ang mapatoo mo lang ang mga tawo nga kana mao ang Kamatuoran. Ug ginatudlo kini sa Dios diha sa Iyang Pulong ug dayon ginapamatud-an kini ngadto kanila nga nagatoo Niini, kay Siya miingon, “Ang tanang butang mamahimo kanila nga nagatoo.”

¹¹ Moingon mo, “Walay butang nga dili mahimo sa Dios.” Nagatoo ba kamo niana? Walay butang nga imposible diha kaninyo, usab. “Kay ang tanang butang mamahimo *kanila*,” (ang Dios usa ka Persona) “kanila nga nagatoo.” Kita n’yo? Busa

walay butang nga imposible diha kaninyo, para kaninyo, kung mahimo lang ninyo nga motoo.

¹² Karon sa Unang Mga Hari, sa ika-17 nga kapitulo, gusto kong basahon ang unang pito ka bersekulo, kon itugot sa Ginoo.

Ug si Elias ang Thisbinhon, nga uban sa mga pumoluyo sa Galaad, miingon kang Achab, Ingon nga buhi ang GINOONG Dios sa Israel, sa kang kinsang atubangan ako nagatindog, walay tun-og bisan ulan niining mga tuiga, kondili sumala sa akong pulong.

Ug ang pulong sa GINOO midangat kaniya, nga nagaingon,

Pahawa ka dinhi, ug lumiso padulong sa silangan, lumiso ka padulong sa silangan, ug magtago ka sa sapa sa Cherith, nga anaa atbang sa Jordan.

Ug mahitabo, nga ikaw mao'y magainom gikan sa sapa; ug gisugo ko ang mga langgam nga uwak sa pagpakaon kanimo didto.

Matikdi, “pagpakaon kanimo didto,” dili nga sa kung asa pa man. “Didto!”

Busa siya miadto ug naghimo sumala sa GINOO, o sa pulong sa GINOO: kay siya miadto ug mipuyo duol sa sapa sa Cherith, nga anaa atbang sa Jordan.

Ug ang mga langgam nga uwak nanagdala kaniya sa tinapay ug sud-an sa buntag, ug tinapay ug sud-an sa hapon; ug siya nag-inom gikan sa sapa.

Ug nahitabo sa wala madugay, nga ang sapa namala, tungod kay walay ulan sa yuta.

¹³ Igadugang unta sa Ginoo ang Iyang mga panalangin sa pagbasa sa Iyang Pulong. Ug karon, niining gabhiona, gusto kong mokuha og teksto gikan dinha, nga gitawag og, “espirituhanong Pagkaon para sa panahon Niini.” Kaganinang buntag nagkaaduna kita og usa ka—usa ka leksyon mahitungod sa—mahitungod sa “Pagbuhat og buluhaton sa Dios, o nagasulay sa pagbuhat og buluhaton Kaniya nga wala . . . wala sa oras, sa panahon, sa lugar, o ang tawo.” Ug karon kini’y: *Espirituhanong Pagkaon Sa Gikatakda Nga Panahon.*

¹⁴ Kining propeta, nga si Elias, diyutay lamang ang atong nahibaloan mahitungod kaniya. Pero nasayod kita nga alagad siya sa Dios, ug ang alagad sa Dios alang niadto nga panahon.

¹⁵ Ug gigamit sa Dios ang iyang espiritu, nga diha kang Elias, sa makatulo na ka higayon, ug nagsaad sa makaduha pa; lima ka higayon, ingon nga grasya. Gigamit Niya kini diha kang Elias; miabot kini kang Eliseo sa doble nga bahin; kang Juan Bautista pud kaniadto; og gitooan nga moabot aron ipasulod ang Gentil nga Pangasaw-onon; ug moabot kauban ni Moises aron ipapauli

ang mga Judio ngadto sa ilang kaugalingong yuta. Husto kana. Lima ka higayon nga gisaad sa Dios nga gamiton ang espiritu ni Elias, ug gibuhat na kini sa makatulo na ka higayon.

¹⁶ Bueno, kining bantugan nga propeta, wala kita masayod kung asa siya naggikan. Hinoon hingsayran nato nga usa siya ka Thisbinhon. Apan sa kung unsang paagi siya miabot. . .

¹⁷ Diyutay ra ang nahibaloan nato mahitungod sa mga propeta. Wala kita mahibalo kung asa sila naggikan. Panagsa ra. . . Ngani, wala ko'y nahibaloan nga adunay propeta nga migikan sa iglesia o adunay kaliwatan sa mga propeta. Sila'y mga ordinaryo lamang nga tawo nga walay-gikahadlok, ug, kasagaran, dili-edukado. Ug wala gani sila og bisan unsa man nga gisulat, bahin sa ilang kaugalingon. Hinoon si Isaias ug si Jeremias, silang duha, adunay pipila ka mga sinulat, apan kining bantugang tawo nga si Elias wala gyu'y gisulat ni usa ka butang. Daghan kanila ang wala nagsulat; tingali'g dili gyud sila makasulat. Apan sila'y mga kalalaken-an nga malig-on. Walay lalaki sa Biblia nga sama niadtong karaang mga propeta. Gisuklan nila ang mga gingharian, mga hari, mga tawo, mga iglesia, ug tanan nang uban pa, ug malig-on nga mibarug sa Pulong sa Dios, ug gipamatud-an pud sa Dios nga sila mao'y husto. Sila'y malig-on gayud nga mga indibiduwal.

¹⁸ Ug kining si Elias mao'y usa sa pinakamabagison nilang tanan. Usa siya ka tawo nga lasangnon. Migula siya gikan sa kamingawan; nagpuyo siya sa kamingawan. Ang Biblia miingon nga siya nagbisti kono og mga balhibo. Aduna siya'y panit sa karnero nga iyang gikupo, ug usa ka panit, sa kamelyo nga nakabakus sa iyang hawak, labihan. . . puno og balbas ang tibuk niyang nawong, ug akong mahanduraw nga usa siya ka lalaki nga nagkagidlay gayud kon tan-awon, ug sud-ongon.

¹⁹ Apan wala kita. . . wala silang tanan nangamatay. Wala silang tanan—tanang nangamatay. Niadtong mga adlaw sa Konseho sa Nicaea, daghan man kaninyo ang nakabasa sa *The Nicene Council of the Early Church*, kaniadtong gusto nila nga maghimo og organisasyon gikan niini ug bungkagon ang tanang uban pa nga mga iglesia, ug maghiusa, sa dihang gipahigayon nila kaniadto ang Konseho sa Nicaea, ang nagkagidlay nga mga kalalaken-an nga sama ni Eliseo mitungha didto gikan sa kamingawan, nga mga utanon lang ang ginakaon; bantugang nagkagidlay nga mga kalalaken-an. Apan ang mga ma'y hataas-og-katungdanan, ang mga kadagkuan, sa ilalum ni Constantine, ug uban pa, gipahilum sila. Tungod kay sila, ingon nga mga propeta, nasayod man nga ang lugas sa trigo sa Iglesiang Pangasaw-onon kinahanglang mahulog sa yuta, maingon nga ang lugas sa trigo sa Pamanhonon kinahanglan nga mahulog usab sa yuta. Ug didto nalubong kini sulod sa usa ka libo ka tuig.

²⁰ Mao kana kon nganong gisulat nila diha sa mga libro karon, “Hain na man kadtong nagpakahilum ra nga Dios nga gipasagdan lang ug nagtan-aw, nakita mismo ang gagmay’ng mga bata nga gipamatay, ug ang mga kababayan-an nga gipangkunis-kunis sa mga leon, ug atua ra sa kalangitan ug wala man lang gisulti mahitungod niini?” Wala man gud sila masayod sa Pulong. Nga kadtong lugas sa trigo kinahanglan man gud nga mahulog sa yuta. Giunsa man sa usa ka matarung nga Dios nga gipasagdan ug gitan-aw lang ang Kaugalingon Niyang Anak nga namatay ug gilud-an, ug uban pa? Apan sumala man gud kadto sa Pulong, mao nga kinahanglan gyud kadtong mahitabo. Ug ingon niana usab bisan hangtud niining panahona.

²¹ Kini nga lalaki, usa siya ka halangdon nga tawo. Aduna na’y usa ka makasasala nga kaliwatan nga nag-una kaniya. Si Ahab mao ang hari kaniadto, ang iyang amahan nga nag-una kaniya nahimong dautan sàb kaniadto. Sukad pa kang Solomon, nagkaaduna na og sunod-sunod nga dautan nga hari. Ug kini nga tawo, si Ahab, nga naghari sa Samaria sulod sa bayntedos ka tuig, mao ang pinakadautan kanilang tanan. Siya’y usa gayud ka modernista. Nagatoo pud siya sa relihiyon, sa walay pagduhaduha. Ug anaa kaniya ang tanan diha sa moderno nga paagi. Aduna siya’y upat ka gatus nga Hebreohanong mga propeta, silang tanan namatuto gayud ug binansay. Nagpadala pud ang Dios og usa kaniya pero wala siya motoo niadto, ug kadto mao si Elias.

²² Pero si Elias, kining Thisbinhon, usa ka tawo nga lasangnon. Dili nga usa ka tawong pino; kondili usa siya ka mabagison nga tawo. Ug usa ka adlaw, human nga nakasala si Ahab hangtud nga dili na kadto maagwanta sa Dios, nakigsulti Siya kang Elias didto sa kamingawan. Ug ania siya nga paadto na sa Samaria, ingon sa kanunay ko nang gihulagway; tingali’g nakadunghay ang puti na nga balbas sa tibuok niyang nawong, nasidlakan sa adlaw ang upaw niya nga ulo, naningkit ang gamay niyang mga mata, nga ma’y dala og sungkod sa iyang kamot, ma’y pahiyom sa iyang nawong, og miduol mismo ngadto sa hari sa Israel, ug miingon, “Ang. . . Walay bisan tun-og nga mahulog hangtud nga igasulti ko kini.”

²³ Hatagan unta kita sa Dios og mga tawo nga sama niana, kita n’yo, mga lalaki nga nahibalo gayud sa ilang ginabuhay nga dala ang MAO KINI ANG GINAINGON SA GINOO.

²⁴ Bueno, nahibaloan nato nga sa wala pa niya buhata kini, gitawag siya sa Dios. Nakigsulti kaniya ang Dios ug, busa, walay bisan unsa man nga iyang gikahadlokan. Wala siya mahadlok sa iyang mensahe, nga basin dili kini mahitabo; tungod nasayod man siya nga mahitabo gyud kini! Nasayod siya nga sumala kini sa Pulong sa Ginoo, ug nasayod pud siya nga siya mao ang propeta sa Dios alang sa maong panahon. Busa bisan pa kung punggoton sa hari ang iyang ulo, ibalhog man siya sa bilangoan,

og unsa ma'y buhaton nila, wala kadto'y sapayan kaniya; tungod aduna ma'y sugo kaniya, "MAO KINI ANG GINAINGON SA GINOO," sa atubangan mismo sa hari. Pagkamabagison gayud nga tawo! Apan sa wala pa niya buhata kini, nga gipanagna kining dakung hulaw. . .

²⁵ Kay ang Dios dili motugot nga ang sala dili-masilotan. Kinahanglan nga aduna gyu'y silot. Unsa ma'y nakanindot sa usa ka balaod kon walay—walay silot? Unsa ma'y kaayohan nga mahimo niana, moingon, "supak sa balaod ang magpadagan samtang nakapula pa ang suga," ug wala diay multa para niini, o walay silot para niini? Dili kini mamahimong usa ka balaod. Busa aduna gyu'y silot sa sala. Ug pag maghimo ang Dios og usa ka balaod, ug kana nga balaod—balaod gisupak, kung ingon-ana siguradong aduna gyu'y silot para niana.

²⁶ Ug gisupak niining nasura ang tanan Niyang mga kasugoan. Oh, aduna sila'y dakung simbahan, aduna sila'y templo. Daghan sila og edukado nga mga tawo. Aduna sila'y mga propeta sa tibuok nasud, dunay mga eskwelahan kanila, diin ginapagraduwar sila nga mora'g sa usa ka makina. Ug daghan sila og mga propeta, daghan sila og—og mga sacerdote, daghan sila og mga escriba, ug daghan pud sila og relihiyon, apan halayo gayud sila sa Pulong sa Dios. Busa nagtawag ang Dios og usa ka tawo nga gawas sa bisan unsa man sa ilang mga laray, ug gipadala siya nga dunay MAO KINI ANG GINAINGON SA GINOO.

²⁷ Ug matikdi kung giunsa Niya pag-atiman ang mga Iyaha Mismo. Adisir Niya gipadala kining propeta nga ma'y dala nga mensahe, Siya miingon, "Elias, umadto ka ug sultih si Haring Ahab niining mga butanga. Ug karon, pag nabuhat mo na, pahilayo ka sa gilayon gikan kaniya, tungod kay naghimo na Ako og usa ka dapit nga imong pagaadtoan sa panahon sa hulaw. Atimanon Ko ikaw, Elias, kung iwali mo lang ang Akong Pulong, og buhata lang kung unsa ang gisulti Ko kanimo nga buhaton."

²⁸ Karon itipo ko kining halangdong ministerio, niining gabhiona, ni Elias ug ang panahon ni Elias, sa panahon nga atong gikahimutangan karon. Nagatoo ko nga usa kini ka hingpit nga tipo. Nahunahuna ko ang mga nasud. . . kung ako. . . aduna pa kita'y oras aron balikan, pero buot ko nga mogahin og hataas nga oras sa linya sa pagpaampo.

²⁹ Busa kung mahimo natong balikan ug masusi, gikuha sa Israel ang Palestina sa mao ra nga basihanan sa pagkuha nato niining Estados Unidos. Nangabot kita dinhi niining Estados Unidos ug gipalagpot ang mga lumolupyo, nga mao ang mga Indian, ug gipanag-iyang yuta. Ug mao man usab nga miabot ang Israel ngadto sa Palestina, ilalum sa pagpanguna ni Josue, sa ilalum sa Dios, ug gipalagpot ang mga lumolupyo ug giangkon ang maong yuta.

³⁰ Ug ang una nilang mga hari mao'y halangdon nga mga tawo: si David, si Solomon, nga halangdon nga tawo. Ang una natong mga presidente mga halangdon man sab: si Washington, si Lincoln, ug uban pa. Dayon sa katapusan ang mga presidente o ang mga hari labi pang nagkadautan sa kanunay, ug sa katapusan misangpot sila sa niining Ahab. Tipo gyud kaayo, susama sa atong panahon. Ug ang mga tawo nahimo nang ingon ka moderno nga dili na nila gustong manalinghug sa tinuod nga Pulong sa Ginoo.

³¹ Ug mahanduraw ninyo, sa usa ka moderno nga katawhan nga sama niadto, kung unsa kaha'y paminaw nila sa usa ka matuod og tinuod nga alagad sa Dios. "Aba, siya'y buangbuang, wala na siya sa husto niyang pangisip. Dili man mahimong magkaaduna og ingon niana nga tawo." Pero mga relihiyoso baya sila, relihiyoso kaayo. Aduna sila'y sinsero nga mga kalalaken-an, aduna sila'y sinsero nga mga tawo. Relihiyoso kaayo sila.

³² Busa nasayod siya nga magkinahanglan gyud og labaw pa sa usa ka ordinaryong teolohiya, magkinahanglan og labaw pa kaysa—kaysa unsa mang ordinaryo nga mensahe, magkinahanglan og labaw pa kay sa pagwali lang sa Pulong, aron masiak ang ilang batohon nga mga kasingkasing. Nasayod siya nga magkinahanglan og MAO KINI ANG GINAINGON SA GINOO aron ipadala didto ang paghukom sa maong katawhan. Busa nasayod siya nga sa pag-adto niya didto nga dala ang MAO KINI ANG GINAINGON SA GINOO (Ug kadto mao'y MAO KINI ANG GINAINGON SA GINOO.), ang isalikway Kadto, nagakahulogan og paghukom. Makita nato kana sa atong panahon, usab. Makita nato kana sa unsa mang panahon. Wala na gayu'y nahibilin pa kondili ang paghukom kon molagpas kamo sa utlanan sa kalooy.

³³ Karon, kana nga tipo dinha, diin, akong igatipo si Elias sa iglesia karon, sa iglesia sa karong panahon. Sa wala pa ang maong paghukom, nadawat niya kining mensahe. Si Elias, nagrepresentar siya, ingon nga giatiman diha sa natural, ang iyang natural nga pagkaon, tungod kay dili na moulan niadtong panahona, sumala sa Pulong sa Dios, sulod sa tulo ka tuig ug unom ka bulan, o hangtud nga igasulti kadto ni Elias. "Unsa mang orasa ang imong isulti, Elias, mao kana ang mahitabo." Busa miduol siya ngadto sa hari, ug miingon, "Walay bisan tungog nga mahulog hangtud nga igasulti ko kini." Bug-at gyud kana nga—nga palas-anon, dili ba? Makuyaw gayud kana nga mensahe!

³⁴ Ug karon ato kanang itipo sa espirituwal nga hulaw sa karong panahon. Bueno, nasayod kitang tanan, nasayod gayud kita, nga adunay usa ka dakung espirituwal nga hulaw sa yuta karong panahona, sa espirituwal nga pagkasulti. Ug, kabalo ba mo, nga gipanagna na kana sa mga propeta, sa dili pa moabot ang Ikaduhang Pagbalik ni Cristo? Ang ingon, "Moabot ang

kagutom sa yuta, ug kini dili tungod sa tinapay lamang, kondili sa pagpatalinghug sa Pulong sa Dios.” Ug kana nga adlaw mao na ang sa karon, “ang pagpatalinghug sa tinuod nga Pulong sa Dios.” Karon, nagatipo kini sa natural nga hulaw diha sa espirituwal.

³⁵ Ang sala ug ang dili-pagtoo, tungod sa mini nga mga magtutudlo ug mga modernista sa iglesia, ang naghatud niini nga kahimtang ngadto sa umaabot, nagasingabot nga paghukom. Dayon mitalikod na sila gikan sa Pulong sa Dios ug sa Iyang propeta, ngadto sa modernong teolohikanhong mga termino sa Pulong.

³⁶ Kung mamatikdan n’yo dinhi, sa ingon nianang panahon usab nga ang Dios nagapatungha og usa ka butang. Tungod kay, Siya, sa kanunay, dili Siya magbuhat og bisan unsa gawas nga ipadayag Niya una kini sa mga tawo, ug ginapadayag gyud Niya kini sa kanunay pinaagi sa Iyang mga alagad.

³⁷ Bueno, apan si Elias, niadtong panahona, adunay usa ka tago nga dapit nga gitagana sa Dios aron iyang pagaadtoan. Mao kana ang butang nga gusto natong makita karon sa dili pa kita magpahigayon og linya sa pagpaampo. Si Elias aduna kaniadto og usa ka tago nga dapit nga gitagana sa Dios Mismo. Bueno, ang iglesia wala gayud nagtagana niadto para kaniya, ang hari wala pud nagtagana niadto para kaniya, wala siya nagtagana sa iyang kaugalingon, kondili ang Dios ang nagtagana og usa ka tago nga dapit para kang Elias aron siya’y makakaon sa tanang oras niadtong panahon sa hulaw, diin giandam ang iyang pagkaon adlaw-adlaw. Dili na niya kinahanglan maghunahuna kung unsay mahitabo pagka-ugma o maghunahuna kung mahurot ang pagkaon. Ang ingon sa Dios, “Gisugo Ko na ang mga uwak ug pakan-on ka nila.” Pagkaanindot nga butang, usa ka tipo sa atong tago nga dapit diha kang Cristo.

³⁸ Sa diha nga ang pangkalibutan nga konseho ug tanan na nga nagakahitabo sa karong panahon, nga nagaingon, “Milabay na ang mga adlaw sa mga milagro.” Ang mga dakung gahum sa Dios giwagtang na sa mga kaiglesihan. Mao nga mora sila og, wala na’y, wala na sila’y bisan unsa man kondili “usa ka nagatingog nga agong ug usa ka nagatagingting nga piyangpiyang.” Nasayod kita niana nga mao ang kamatuoran. “Ug ma’y dagway sa pagkadiosnon, ug nanagdumili sa Gahum niini.”

³⁹ Mao ra usab nga butang ang gibuhath ni David, kaganinang buntag, nga gamit ang mga carro sa baka, og napahilayo na sa Pulong. Sa dihang gipahayag ang Pulong ug gihatag kanila, dili man nila Kini gusto; busa, napahilayo gyud hinoon sila gikan Niini.

⁴⁰ Ingon niana ang gibuhath niadtong mga tawo sa mga adlaw ni Elias, mipahilayo sa Pulong. Nagdahum sila nga anaa kanila

ang Pulong, apan wala diay sila Niini.

⁴¹ Busa matikdi, kaniadto, sa . . . sa panahon nga Iya nang silotan ang dili-magtotoo, nagbuhat Siya og paagi alang sa magtotoo. Mao ra mismo ang Iyang ginabuhat sa matag panahon. Niadtong mga adlaw nga Iya nang pagalaglagon ang kalibutan pinaagi og baha, nagbuhat Siya og paagi aron makaikyas si Noe. Niadtong mga adlaw nga igaunlod na Niya ang Egipto, nagbuhat pud Siya og paagi aron makaikyas ang Iyang katawhan patabok sa dagat. Nagabuhat gayud ang Dios og Iyang paagi! Ug kon diin gani walay dalan, Siya mao mismo ang Dalan. Siya mao kadtong Dalan!

⁴² Karon maamgo nato nga nagaatubang kita sa pipila ka . . . usa sa pinakamakuyaw nga takna nga nasayran sa kasaysayan. Dili man gyud ang warhead nga dunay mahayag og nagasidlak nga missile, nga dunay ulo niini, ang angay natong kahadlok. Kondili ang mga kasimbahanan mismo ang angay natong kahadlok. Ang panahon nga atong gikapuy-an ang angay natong bantayan.

⁴³ Karon matikdi, apan nagbuhat ang Dios og paagi para kang Elias aron makaikyas niadto. Ug nagbuhat pud Siya og paagi para sa Iyang nagatoo nga mga anak aron makaikyas niini sa karon, sa kapungot ug sa mga butang nga umalabot.

⁴⁴ Tungod kay, dili man makatarunganon ang Dios nga hukman kadto nga mga tawo ug padalhan sila'g silot, ug iunlod ang Sodoma ug Gomorra, ug iunlod ang Capernaum sa tunga-tunga sa dagat, ug hukman kadto nga mga kaliwatan, ug ang Sodoma ug Gomorra, ug unya tugotan kita sa pagbuhat sa mao rang butang ug makalusot ra niana. Ingon ka sigurado na gyud kita alang sa paghukom maingon nga sila usab kaniadto sigurado na alang sa paghukom. Karon namatikdan nato nga ang . . .

⁴⁵ Sa diha nga nanungha kadtong mga butanga, ang moderno nga urog niadtong panahona, nagpatungha ang Dios og usa ka tawo alang niadtong panahona, o nagsugo diay og usa ka tawo, aron, batokan ang maong mga puwersa, pero wala sila maminaw niadto. Nagdahum sila nga buangbuang siya, nga nawad-an siya sa husto niyang pangisip, nga siya'y usa lamang ka tigulang nga panatiko, buangbuang nga gikan sa kamingawan, nga daw sa buang sa kalasangan. Apan, bisan pa niana, anaa kaniya ang Pulong sa Ginoo.

⁴⁶ “Ang Pulong wala man nagapasabot sa kung unsay ginaingon Niini,” ang sulti nila karong panahona. “Oh, bueno, ang Biblia usa ra man ka libro sa kasaysayan.” Siguro nakita na ninyo kini, nga ginapamahayag nila karon, nga, “Si Eva kono wala mikaon og mansanas, kondili mikaon siya og usa ka . . .” Unsa gani kadto? Nagatoo ko . . . “Usa kono kadto ka melokoton,” ang ginaingon nila karon. “Usa kono kadto ka

melokoton.” Ug dayon, kono, “Wala gidala ni Moises ang mga anak latas sa Dagat nga Mapula. Usa kono kadto ka dakung hugpong sa mga bagakay, hangtud didto sa pikas tampi niadtong dagat, ug milatas kono siya sa usa ka dagat sa mga bagakay.” Kung ingon-ana giunsa man nga ang tubig, t-u-b-i-g, nahimong mora’g dingding sa isig ka kilid, og milatas sila sa yuta nga mamala, kung ingon-ana? Oh, binuang gayud! Apan, nakita n’yo, nagkinahanglan man gud og ingon niadto nga matang sa panahon aron mapahamtang ang kapungot sa Dios ngadto sa mga tawo. Ingon niana kini.

47 Ginaingon pud nila nga walay ingon nianang butang nga sama—sama niining. . . Bisan ang mga tawo sa iglesia wala na nagatoo og mga milagro. “Hatagan tà ka og usa ka libo ka dolyar,” ingon nila, “pakitai lang ko og usa ka milagro. Pakitai ako og usa ka milagro!” Bueno, dili gyud nila kini makita kung aduna na’y napulo ka libo ka butang ang napamuhat na sa ilang atubangan. Grabe, sila, dili gayud nila kini makita.

Moingon mo, “Impossible kana.” Oh, dili, dili gayud.

48 Si Elias usa niadto ka higayon atua didto sa Dothan, ug nangabot ang Sirianhon nga mga kasundalohan ug gipalibotan ang siyudad, aron dakpon siya, tungod nasayod man sila nga didto ang—ang gahum sa nasud napahimutang, didto sa maong magtatan-aw. Aba, ang hari. . . Usa sa mga kalalaken-an ang nagsulti sa hari sa Siria, miingon, “Aba, abi nimo, si Elias nga propeta, ang Thisbinhon, nagasulti baya sa hari sa Israel kung unsay imong ginasulti sulod sa imong tago nga lawak.”

49 Miingon, “Lakaw og dakpa ninyo kanang tawhana! Kanang tawhana gyud ang nagababag kanato.” Ug hilum nga miadto sa Dothan ang tibuok kasundalohan nga Sirianhon. Gipalibotan nila kadto.

50 Ug si Gehazi, ang—ang sulogoon sa maong propeta, nahigmata, ug siya miingon, “Oh, amahan ko, ang mga kasundalohan nakapalibot na gayud kanato dinhi. Bug-os na gyud kitang napalibotan.”

51 Ingon niya, “Aba, mas daghan pa ang nagauban kanato kay sa nagauban kanila.” Kita n’yo?

Ug mitan-aw si Gehazi sa palibot, miingon, “Wala ma’y bisan usa nga akong nakita.”

52 Ingon niya, “Ginoong Dios, ablihi ang mga mata niining batan-on.” Ug naabli ang iyang mga mata, ug ang tibuok kabungtoran nalukop diay sa mga Manulonda ug mga carro nga napahimutang sa palibot, ang dili-makita nga Kasundalohan.

53 Migawas si Elias didto, ug ang Biblia nag-ingon, “Gibutahan niya sila.” Miduol siya ngadto kanila; pero nangabuta sila kaniya. Miduol ug miingon, “Ginapangita ba ninyo si Elias?”

Mitubag pud kadto, “Oo, ginapangita namo siya.”

54 Miingon, “Umari kamo, isulti ko kaninyo kung asa siya,” ug gipangunahan sila mismo ngadto sa lit-ag, diretso mismo kon diin nanggawas ang mga kasundalohan ug gidakop sila.

55 Karon, miingon ang Biblia, “Gibutahan niya sila.” Mao na kana. Ug ang mga tawo sa karong panahon ingon na gyud ka buta sa espirituwal, bisan pa kon mokanaug ang Ginoong Dios diha sa taliwala sa katawhan ug mobuhat og unsa man, ug sa mga butang nga Iyang gisaad, dili gihapon nila Kini makita. Sila’y mga buta gayud sa espirituwal; wala makaila sa Dios, og wala masayod sa Iyang dakung Gahum. Karon, atong namatikdan nga ingon-ana ang gibuhat nila niadtong mga adlaw ni Elias, ug ingon-ana sa gihapon ang ilang ginabuhat karong panahona. Gibutahan sila sa Dios. Ginaingon nila karon, nga, “Wala na’y mga milagro, wala ma’y ingon nianang butang, emosyon lang man kining tanan.”

56 Ug mao sàb gihapon ang gisulti nila mahitungod kang Elias, tungod kay sa dihang gilalin siya ug si Eliseo na ang mipuli kaniya, usa ka batan-ong lalaki, nga naupaw na, nga batan-on pa, gigukod siya kaniadto sa mga bata, ug miingon, “Tigulang nga upaw, nganong wala man ka mikuyog kang Elias?” Kita n’yo, wala gani sila mitoo Niini sa sinugdan, ang katawhan, human nga gipamuhat na ang ingon ka daghang mga butang. Ug kining halangdon nga tawo sa Dios gilalin man ngadto sa Langit pinaagi sa carro nga kalayo, ug ang katawhan wala gihapon mitoo Niini. Ug gipasagdan ra ang ilang mga gagmay’ng kabataan nga naggukod-gukod niining maong tawo ug nanag-ingon, “Tigulang nga upaw, nganong wala ka man mikuyog paitaas?” Kita n’yo? Ug pagkahuman gitunglo sa propeta ang maong mga bata, ug gipatay sa usa ka babayeng oso ang kuwarentay-dos kanila.

57 Karon matikdi. Sa karong panahon, maingon sa kung unsa kaniadto, ginabutang nila ang ilang kinaugalingong paghubad sa Pulong. Karon, kung gusto nilang buhaton kana, anaa ra kana kanila, pero sulayan pa man gud nila nga patoohon kita niana. Miingon ang Biblia nga, “Kining Pulong sa Dios walay unsa man nga kinaugalingong paghubad.” Ang Dios ang nagahimo sa Kaugalingon Niyang paghubad. Ginapanghimatud-an sa Dios ang Iyang Pulong, ug mao na kana ang hubad Niini. Sama sa gikaingon ko na sa makadaghan nang higayon, miingon Siya sa sinugdanan, “Motungha ang kahayag,” ug nagkaaduna og kahayag. Dili na kana kinahanglang hubaron pa; nahitabo mismo kana. Miingon Siya, “Usa ka ulay ang manamkon,” og nanamkon ang maong babaye. Miingon Siya nga Iyang “igabubo ang Iyang Espiritu,” gibuhat gayud Niya. Ug miingon Siya, “sa kaulahiing mga adlaw,” ang mga butang nga Iyang pagabuhaton, ug ginabuhat gyud Niya kini! Wala na kini nagkinahanglan og bisan unsa nga paghubad; ang Dios na ang nagahimo sa Kaugalingon Niyang paghubad. Bisán unsa pa ang

isulti sa buangbuang nga tawo, dili kana makapahunong sa Dios bisan gamay.

⁵⁸ Kaniadtong ania pa si Jesus sa yuta, ingon na gyud kadaku nga kawalay-pagtoo ang Iyang gipakigbisogan nga sama sa aduna kita karong panahona, ug tingali'g labaw pa. Apan wala kini nakapahunong Kaniya; ngani nagpadayon gihapon Siya sa pagtuman ug pagbuhat sa Iyang katungdanan, ug ginapanghimatud-an gyud sa Dios ang tanang butang nga Iyang gipamuhat. Siya miingon, "Wala Ako mag-inusara sa Akong Kaugalingon. Ang Akong Amahan ug Ako usa ra; nagapuyo Siya Kanako. Dili Ako ang nagabuhat sa mga buhat, kondili ang Amahan nga nagapuyo Kanako. Ug kung wala Ko ginabuhat ang Iyang mga buhat, nan ayaw ninyo Ako toohi; apan kung ginabuhat Ko ang mga buhat ug dili gihapon kamo makatoo Kanako, toohi n'yo ang mga buhat." Kita n'yo? Sa laing pagkasulti, sila . . . "Susiha ninyo ang mga Kasulatan," ang ingon Niya, "kay dinha naghunahuna man kamo nga makabaton kamo og Kinabuhing Walay Katapusan, pinaagi sa paghibalo sa mga Kasulatan. Ug ang mga Kasulatan, Mismo, ang nagapamatuod Kanako." Amen! Pagkaanindot nga pahayag! "Kini sila, ang mga Kasulatan, mao ang nagasulti kaninyo kung Kinsa Ako," ang ingon ni Jesus.

⁵⁹ Ug ang mga Kasulatan usab ang nagasulti kaninyo sa panahon nga atong gikapuy-an. Ug ang mga butang nga nangakita ninyo nga gipamuhat, kini'y ang Dios Mismo sa taliwala sa Iyang katawhan. Walay si bisan kinsa nga makapabanhaw og patay kondili ang Dios lamang. Walay si bisan kinsa nga makabuhat sa mga butang nga Iyang ginabuhat karon kondili Siya lamang. Kay ang Biblia miingon, "Siya mao sa gihapon kagahapon, karon, ug hangtud sa kahangturan."

⁶⁰ Karon makita nato kanang moderno nga dagan sa panghunahuna sa mga tawo, pagkahuman, "Oh, milabay na ang maong mga adlaw, wala na'y ingon nianang butang nga sama sa mga milagro. Ang mga tawo nadala lang gayud sa emosyon."

⁶¹ Paminawa n'yo kadtong Elias, ang propeta, nga nagasinggit batok kanila ug sa ilang mga teologo. Matikdi, matikdi n'yo, nanulti siya nga mora'g siya ang Dios Mismo. Nanulti si Elias nga mora'g siya ang Dios Mismo, "Ang tun-og dili mahulog gikan sa Langit hangtud nga igasulti ko kini." Amen! Oo, sir.

⁶² Ang maong propeta dugay na man nga anaa sa Presensiya sa Dios, ang mga propeta sa Daang Tugon, o sa unsa mang panahon, nagakinabuhi sila diha sa Presensiya sa Dios hangtud nga nahimo na sila nga Pulong, ang ilang Mensahe mao na ang Pulong Mismo. Ug, hinumdumi, siya miingon, "MAO KINI ANG GINAINGON SA GINOO." Ug sa diha nga nadawat na niadto nga mga tawo kadtong mga mensahe nga gikan sa

Dios, ug sila'y nalanggikit na gyud og ayo hangtud nga ang kaugalingon nilang panghunahuna . . . Mahimong supak kini sa ilang panghunahuna, tingali'g dili nila mahimo nga—nga makita kini nga husto. Apan ginasulti gayud nila ang Pulong sa Dios, “MAO KINI ANG GINAINGON SA GINOO.”

⁶³ “Dili gyud magkaaduna og bisan unsang ulan hangtud nga igasulti ko kini.” Oh, pagkagamhanan nga pahayag! Midugay siya sa Presensiya sa Dios ug bug-os siyang gipanghimatud-an. Ug, hinumdumi, nagauyon usab kana sa Amos 3:7, “Ang Ginoong Dios dili magbuhat og bisan unsa gawas una nga Iyang ipadayag kini ngadto sa Iyang mga alagad ang mga propeta.” Miingon, “Wala gayu'y ulan nga mahulog!” Iya unang . . .

⁶⁴ Pero gikataw-an ra nila siya, naghunahuna man sila nga nabuanga na siya, “Kanang panatiko!” Apan, kita n'yo, anaa gyud kaniya ang MAO KINI ANG GINAINGON SA GINOO nga dili moulán. Ug, ang Dios, sa wala pa niya buhata kadto, Iya kining gipadayag ngadto kang Elias nga Iyang alagad. Ug usa man siya ka gipanghimatud-an, gipamatud-an nga propeta, busa angay gyud unta nga naghinulsol ang mga tawo. Pero, imbis nga ingon niana, gikataw-an hinoon nila siya, miingon, “Oh, daghan man tà og ulan! Puno gani ang mga pundohanán. Nagadagayday pud og maayo ang mga suba.”

⁶⁵ Pero miingon ang Biblia nga, “Walay bisan tun-og sulod sa tulo ka tuig ug unom ka bulan.” Tuod man namala gayud ang tanang mga sapa ug mga katubigan, sa tanang dapit. Dili kadto tungod sa maong tawo, kondili ang Dios kadto nga nagasulti pinaagi niadto nga tawo. Kadto mao ang “Ako” mao kadto. Nasayod kita sa kanunay. Busa siya . . .

⁶⁶ Nahibaloan nato nga pag nagaabot ang usa ka tawo, nga gipadala gikan sa Dios, nga gitagana sa Dios, nga ma'y tinuod nga MAO KINI ANG GINAINGON SA GINOO, ang maong mensahe ug ang mensahero usa ra ug managsama ra. Tungod kay gipadala siya aron ipahayag ang MAO KINI ANG GINAINGON SA GINOO, Pulong sa Pulong, busa siya ug ang iyang mensahe managsama ra.

⁶⁷ Ang usa ka tawong makadenominasyon ilalum sa pagsuporta sa denominasyon, siya ug ang iglesia “usa ra.” Ang usa ka teologo ilalum sa teolohiya, nga hinimo sa usa ka denominasyon, siya ug ang iyang mensahe usa ra; iglesia sa teolohiya, usa ka teologo. Husto gayud.

⁶⁸ Busa sa dihang nagaabot ang usa ka tawo nga ma'y MAO KINI ANG GINAINGON SA GINOO, siya ug ang maong Mensahe usa ra. Ug kaniadtong miabot si Elias nga dala ang MAO KINI ANG GINAINGON SA GINOO, siya ug ang iyang mensahe nahimo nang usa. Sama lang ni Jesus, kaniadtong mianhi Siya, Siya mao ang Pulong, San Juan 1. Busa ang

Pulong sa Dios ug ang mensahero sa kapanahonan managsama ra mismo, sa tanang panahon. Tinuod kana.

⁶⁹ Si Jesus mao ang Pulong nga gipropesiya kaniadto. Siya mao ang gikaingon sa mga propeta nga mahitabo, “Usa ka ulay ang manamkon ug maghimugso niini nga Bata.” Sa sinugdanan pa kaniadto, gisultihan na sila sa Dios, miingon, “Ang Binhi sa babaye mao’y magasamad sa ulo sa serpente, ug ang serpente ang magasamad sa iyang tikod.” Kining tanan nga mga propesiya gihatag na. Si David nga nagahilak kaniadto, og ang tanang uban pa nga mga propeta sa tanang nangaging mga kapanahonan, nagahisgot na mahitungod Kaniya. Siya mao kadtong Pulong nga napadayag! Alleluyah!

⁷⁰ Karon nasabtan ba ninyo ang ginapaningkamotan kong maipasabot? Ngani namulong ko kaninyo sa ingon ka yano kaganinang buntag. Dili ba ninyo makita ang awtoridad sa buhi nga Dios diha sa buhi nga Iglesia, ang Pangasaw-onon? Nangaayo ang mga ma’y sakit, nabanhaw ang mga patay, nakalakaw ang mga bakul, nakakita ang mga buta, og padayon nga ginapahayag ang Ebanghelyo diha sa gahum Niini, kay ang Mensahe ug ang mensahero managsama ra. Ang Pulong anaa sa Iglesia, anaa sa tawo.

⁷¹ Ang Pulong sa Dios atua kang Elias sa dihang miadto siya didto nga ma’y MAO KINI ANG GINAINGON SA GINOO, ug miingon, “Dili moulan.” Dili na kadto si Elias; kondili ang Dios kadto nga anaa kang Elias.

⁷² Gikaingon ko na sa makadaghang higayon, sama niadtong babaye nga Christian Science nga miingon kanako usa ka higayon. Gisulti ko na sa makadaghan nang higayon ang mahitungod niini. Miingon siya, “Mr. Branham, ginapasigarbo ra kaayo nimo si Jesus.”

Ingon ko, “Nagalaum ko nga kana lang unta nga butang ang kinahanglan kong panubagon.”

Ug ingon siya, “Ginapaninguha mo nga himoon Siyang Dios.”

Ingon ko, “Dios man Siya.”

⁷³ Miingon, “Oh, usa Siya ka propeta, usa Siya ka maayong tawo, pero dili Siya Dios.”

⁷⁴ Ug ingon ko, “Bueno, ipakita kanako ang usa ka Kasulatan nga nagaingon nga Siya’y dili ingon-ana.”

⁷⁵ Ingon siya, “Sa Basahon ni San Juan, ginaingon niini nga Siya ‘mihilak’ sa dihang miadto Siya sa lubnganan ni Lazarus.”

⁷⁶ “Bueno,” ingon ko, “oo, mihilak Siya. Pareho Siya nga tawo ug Dios. Usa Siya ka tawo, nga nagahilak; apan gikinahanglan nga Dios Siya aron banhawon ang patay.” Husto. Ingon pa ko, “Tawo Siya, nga gigutom; apan Dios Siya nga nagpakaon sa lima ka libo, pinaagi sa duha ka tinapay ug lima ka isda.” Husto kana.

“Tawo Siya, nga nahikatulog sa luyo sa sakayan; apan ang Dios kadto nga anaa Kaniya ang nagpahunong sa mga tubig.” Kay ngano man? Siya ug ang Iyang Mensahe usa ra.

⁷⁷ Siya miingon, “Ako ug ang Akong Amahan usa ra. Ang Akong Amahan nagapuyo Kanako.” Siya mao ang kahupnganan sa pagka-Dios sa pagkalawas.

⁷⁸ Sa hunahuna ko makapakurat gayud niadtong miaging adlaw, sa dihang gipahayag ko *Ang Pito Ka Kapanahonan Sa Iglesia*. Sa sugod, ako—wala nako mahisabti kon nganong nagatindog si Jesus didto nga aduna niadtong...adunay puti sa ibabaw Niya nga nakaingon niana, ang ingon, “Ang Iyang buhok ingon ka maputi sama sa balhibo sa karnero.” Wala nako mahisabti kung giunsa nga ang usa ka lalaki nga traynta’y-tres anyos pa ang panuigon mamaingon na ka puti sa niyebe ang buhok.

⁷⁹ Mao nga gitawgan ko ang usa ka maayong teologo, Pentecostal nga teologo, usa ka buutan nga suod nga higala. Bueno, si Igsoong Jack Moore kini. Siya’y maantigo, og maalamon nga tawo. Ingon siya, “Igsoong Branham, si Jesus kana nga gihimaya na. Ingon niana ang hitsura Niya kaniadto human nga Siya gihimaya.” Dili, dili ko makatoo niana. Dili.

Ako—ako—miingon ko, “Bueno, Igsoong Moore, salamat.”

⁸⁰ Misulod ko didto sa lawak ug nagpakig-istorya sa Dios. Gitan-aw ko ang akong concordance aron balikan Siya sa Daniel, diin giingon niini, “Ug miabot siya sa Tigulang sa mga Adlaw Nga ang buhok ingon ka maputi sama sa balhibo sa karnero.” Ingon ko, “Ginoo, ako—ako—wala ako kabalo kung unsay isulti, ug ania kanako ang responsibilidad.” Bueno, kadto’y sa wala pa ang se...ug hinumdumi, sa wala pa naablihan ang Pito ka Selyo, mga usa ka tuig na o kapin, kaniadto. Nag-ampo ko didto, “Ginoo, unsa man kini?”

⁸¹ Ug mitan-aw ako, ma’y nagatindog sa akong atubangan, ug atua nagatindog ang usa ka lalaki ug usa siya ka maghuhukom, ug nakasul-ob siya og puti nga peluka. Ang karaan nga mga maghuhukom sa karaang mga adlaw kaniadto nagasul-ob man og puti nga peluka aron ipakita nga siya mao ang ma’y pinakataas nga awtoridad.

⁸² Ug dayon sa dihang nakita ko si Jesus nga ma’y puti nga peluka, miingon ko nga ginapanghimatud-an lang niini ang kamatuoran nga atong nasayran, nga Siya mao ang ma’y Pinakataas nga Awtoridad. Gipamatud-an pud sa Dios ang mao gihapong butang didto sa Bukid sa Pagkabalhin, miingon, “Kini mao ang Akong Anak nga pinalangga, patalinghugi n’yo Siya, ang ma’y Pinakataas nga Awtoridad!”

⁸³ Dayon didto na kaniadto ang pagsugod sa Pito ka Selyo, sa dihang mikanaug kadtong pito ka Manulonda diha sa pormang piramide, nagatindog didto ug gisultihan ako nga mobalik dinhi

ug mamulong mahitungod sa Pito ka Selyo, ug Siya magauban kanako, ipakita Niya kanako kung unsa gyud ang mga niini, ang mga nangawalang butang. Gahunahuna ko sa una pa nga giselyohan kadto sa luyo sa Basahon ug nga usa kini ka butang nga wala nahisulat sa Basahon, apan nahitabo nga gipahayag kini nga dili Niya mahimo kana. Dili kini usa ka butang nga nahisulat diha sa Basahon. . . Kini’y usa ka butang nga gililong diha sa Basahon. “Kay ang si bisan kinsa nga magataktak og usa ka Pulong gikan Niini o magadugang og usa ka pulong ngadto Niini. . .” Busa usa kini ka misteryo nga dugay nang anaa sa Basahon sa niining pito ka kapanahonan sa iglesia. Ang matag usa niini naghatag og usa—usa ka misteryo, tanan na mahitungod sa bautismo sa tubig ug kining uban pang mga butang nga dugay na gayud nilang ginahibalo.

⁸⁴ Dayon sa dihang mipaitaas kadto, ang mga dagkung obserbatoryo gikan pa didto sa California, hangtud didto sa Mexico, didto sa Tucson, og sa bisan asa, naretratohan diay Kini. Usa Kadto ka kahibulongan nga talan-awon. Si Igsoong Fred Sothmann dinha, nga nagalingkod dinha sa luyo, ug kami ni Igsoong Gene Norman, atua kami nagatindog mismo didto sa dihang mipaitaas Kini. Ilang giretratohan, pero wala gihapon sila mahibalo kung unsa gayud kini. Dinhi usa ka higayon kaniadto, nanag-ingon ang tanan, “Tan-awa dinhi. Mora kini og *ingon niini*, ug ang mga pako niadtong mga Manulonda, kung giunsa nga nakatiklop ang mga niini dinha.”

⁸⁵ Usa niana ka adlaw, giliso ko kini paingon sa tuo, og nakita ko, atua si Jesus Cristo nga ingon gayud ka tukma sa pagkadrowing ni Hofmann Kaniya. Atua Kini didto nga nagasul-ob og puti nga peluka, nagalantaw paubos sa yuta, nga nagapakita nga Siya mao ang ma’y Pinakataas nga Awtoridad. Ginapamahayag kini sa Kalangitan, ginapamahayag kini sa Biblia, ginapamahayag kini sa Mensahe, mao ra tanan. Ang ma’y Pinakataas nga Awtoridad, nga nagasul-ob og puti nga peluka; makita pud ninyo ang Iyang itum nga balbas sa ubos. Daghan kaninyo ang nakakita na sa maong hulagway. Aduna kita niini dinha sa luyo. Lisoa lang kini paingon sa tuo, patakilid, og tan-awa n’yo kini. Atua Siya, ingon gayud ka tukma sama kaniadto, kung nakuhaan pa Siya og retrato kaniadto. Ginatan-aw lang nila kini sa sayup nga anggulo. Kinahanglan n’yong tan-awon kini sa insakto nga anggulo. Ug ang Ginoong Dios lamang ang makapadayag kung unsa ang insakto nga anggulo. Lisoa n’yo kini pa-tuo ug tan-awa kini. Atua Siya, ingon ka tukma gayud kung nakuhaan pa kini og retrato, didto sa itaas mismo.

⁸⁶ Sa unang higayon nga nakita ko Siya, mora Siya og sa kadtong *Ulo ni*. . . Hofmann. Ngani wala ko pa nakita kana kaniadto. Ug didto sa tabernakulo ni Billy Sunday, pila ka tuig human niadto, nakita ko kini. Ang akong balay wala na nawad-an og usa sa maong mga hulagway sukad niadto.

⁸⁷ Dayon, dinhi sa kawanangan, nga nagaingon nga ang mismong Dios nga akong nakita sa panan-awon dinhi kaniadto, usa pa lang ko ka batang lalaki kaniadto dinhi kon diin napahimutang kining eskwelahan, ingon niana gyud ang hitsura Niya. Ug dinhi sa Kalangitan, traynta'y-tres ka tuig human niadto, gipahayag kini, nga kini mao ang kamatuoran. Ingon niana ang hitsura Niya; dili nga usa ka mysteryosong butang nga ideya ra ni bisan kinsa man.

⁸⁸ Sama didto sa Vatican, aduna sila og usa—usa—usa ka Cristo nga gidrowing didto, nga ma'y usa ka gamay'ng pinalingin nga puti nga balbas o usa ka pinalingin nga balbas palibot sa iyang suwang, nga mga tunga sa pulgada ang katas-on, og nakapalibot mismo sa ibabaw sa Iyang baba ug nakaingon *niini*, ug ginatawag kadto nga ang Cristo.

⁸⁹ Nagpahinumdom hinoon kadto sa ako sa usa ka Griyegong pintor nga akong nakita usa ka higayon sa usa ka karaang katedral, nga ginapakita kung unsa kono ang hitsura ni Adan ug ni Eva; pero mora sila og mga mananap o unsa man. Ingon niana gyud ang mahunahuna sa karnal nga panghunahuna mahitungod sa usa ka butang nga espirituwal. Sa hunahuna ko si Adan man ang pinaka-ambongan nga lalaki nga nabuhi, ug si Eva ang hingpit nga babaye sa tanang aspeto.

⁹⁰ Bueno ginalimin sa karnal nga mga panghunahuna ang maong Butang sa kaugalingon nilang mga ideya, dayon ginapadala sa Dios ug ginapadayag ang maong Butang pinaagi sa Iyang Gahum. Ingon niana mismo ang nahitabo dinhi kaniadto sa mga adlaw ni Ahab.

⁹¹ Karon, nahibaloan nato nga masulti kana ni Elias, tungod kay ang Mensahe sa panahon ug ang Pulong sa Dios, o, ang mensahero, ang Mensahe—ang Mensahe, ug ang Pulong, eksaktong mao ra. Ang propeta, ang Pulong, ang Mensahe; ang mensahero, Mensahe, ug ang Mensahe, mao ra mismo. Miingon si Jesus, “Kung wala Ko ginabuhat ang mga buhat nga nahisulat mahitungod Kanako, nan ayaw ninyo Ako toohi.” Maayo kana. Ang si kinsa mang tawo ug ang iyang mensahe usa ra.

⁹² Mao kana kon nganong sa karong panahon wala sila nagatoo sa pagbuhat sa mga buhat sa Dios, tungod kay dili man nila ginadawat ang Mensahe sa Dios. Wala sila nagatoo sa Mensahe.

⁹³ Apan kadtong mga nagatoo sa panahon sa Dios nga atong gikapuy-an, kining mga butanga mao'y mga tinago nga Pagkaon. Palandunga lang, gitago gayud Kini sa Dios nga bisan ginatan-aw na nila Kini mismo pero dili gihapon nila Kini makita. Mao ra gihapon nga gibutahan ni Elias ang mga kasundalohan nga Sirianhon. Mao sab gihapon nga ginabutahan sa Dios ang dili-magtotoo sa tinuod og matuod nga Pagkaon sa anak, ang magtotoo.

94 Ang gibansag nila kang Noe kaniadto, “usa ka panatiko,” nga nagabuhat og arka, bukas ang iyang mga mata sa Pulong sa Dios ug sa saad. Pero ang mismong butang nga gitawag nila nga panatisismo, ang nagluwas kang Noe ug sa iyang pamilya. Kita n’yo, ang mao ra mismong butang. Ang butang nga ginakatawan sa mga tawo, mao sab ang butang nga atong ginaampo. Ang butang nga ginatawag sa mga tawo nga “buangbuang,” ginatawag nato nga “Halangdon!” Ang ginatawag sa kalibutan nga “halangdon,” ginatawag sa Dios nga “kabuangan.” Ug ang ginatawag sa kalibutan nga “kabuangan,” ginatawag sa Dios nga “Halangdon!” Kini’y eksakto gayud nga kalainan tali sa Husto ug sayup. Si Jesus Cristo mao sa gihapon kagahapon, karon, ug hangtud sa kahangturan.

95 Hinumdumi, miadto siya sa iyang tago nga dapit sumala sa plano sa Dios, sumala sa pagtawag sa Dios, ug sa Pulong sa Dios. Misulod si Elias sa iyang tago nga dapit sumala sa pagkahibalo-nang-daan sa Dios, plano, ug sa pagtawag sa iyang kinabuhi, ug sumala sa Pulong. Kung dili kana ang paagi sa atong pagsulod, wala na ko kabalo kung sa unsang paagi kita makadangat didto.

96 Ug matikdi, sa wala pa nagsugod ang hulaw, misulod na si Elias niadtong tago nga dapit para sa iyang pagkabuhi. Usa gayud ka tipo nga sa dili pa mosugod hampak ang paghukom sa kalibutan, gitawag na pagawas ang Iglesia, gipili na ang Pangasaw-onon, ug nagahulat na lang sa dili pa mahitabo ang paghukom. Nagahulat na, nga nagakaon sa Pagkaon sa Dios, nagakalipay sa mga panalangin sa Dios. Ang si kinsa mang tawo nga anaa sa normal niya nga pangisip nasayod gyud nga diretso na kitang nagapaingon, haduol na gyud kita sa takna sa paghukom.

97 Matikdi n’yo! Igsoong Banks, og pipila sa inyo nga mga kalalaken-an nga ania karong gabhiona, nga atua didto sa maong bukid niadtong buntaga.

98 Ug gusto kong hisgotan ang mahitungod niadto nga bukid, sa sunod Domingo sa buntag, kon itugot sa Ginoo. Nakadawat ako og usa ka dakung kapadayagan, usa ka dugang nga butang nga halos dili nako mapugngan nga masulti kini karong gabhiona. Apan aduna ako’y...Kita n’yo? Ug sa kanunay, sa tanang panahon, sunod-sunod nga butang ang nagakahitabo. Kita n’yo? Dili gayud kini mohunong sa pagkahitabo, tungod kay MAO KINI ANG GINAINGON SA GINOO.

99 Ang matag usa kaninyo dinhi, og linibo ka pilo dinha sa teyp, nakadungog kanako nga mibarug ug miingon, “MAO KINI ANG GINAINGON SA GINOO, kini’y mamahimo gayud nga *ingon-ani* ug *ingon-ana*.” Ug bisan ang mga mantalaan ug mga magasin kinahanglang ipahayag kini nga mao gayud. Ngani wala sila masayod kung unsa gyud kini, apan nakita nila kini. Wala sila

masayod kung unsa kini, pero nakita nila kini, nga ginahimo ang Pulong nga kamatuoran gayud.

¹⁰⁰ Atua kami kaniadto didto sa ma'y suba, nga mikanaug ang Manulonda sa Ginoo niadtong adlaw, traynta'y-tres ka tuig, o, niadtong 1933, mikanaug ug gisulti ang mga butang nga Iyang gipanulti. Mihaw-as ako, ug daghang mga tawo ang nagatindog kaniadto didto sa tampi, miingon, "Unsa ma'y buot ipasabot niadto, Billy?"

¹⁰¹ Ingon ko, "Dili kadto para sa ako; para man kadto sa inyo. Nagatoo ako; kamo wala." Ug nagpadayon lang ko sa paglakaw.

¹⁰² Dayon miingon kanako ang pastor, ingon siya, "Buot mo bang ipasabot nga ikaw, nga ma'y ikapitong grado lang nga edukasyon, magasangyaw sa tibuok kalibutan ug magaampo para sa mga monarka ug mga gamhanan ug mga hari ug mga ingon-ana? Ug, oh," ingon pa, "kalimti Kana!"

¹⁰³ Dili ko gayud Kini mahikalimtan, ingon nga naikulit na Kini nganhi sa kasingkasing ko. Bueno ania, traynta'y-tres ka tuig human niadto, ang tanan nga Iyang gisulti nahitabo gayud nga ingon ka tukma sa Iyang pagkasulti nga pagabuhaton Niya kini. Dios Siya ug dili gyud mapakyas. Ginatuman Niya sa kanunay ang Iyang Pulong. Siya... Mao nga ayaw gayud mo pagduhaduha Niini.

¹⁰⁴ Karon, matikdi, misulod siya sumala sa plano sa Dios (pagkahibalo-nang-daan), sa pagtawag sa Dios, ug sa Pulong sa Dios, ug misulod sa wala pa miabot ang hulaw.

Karon, nasayod kita nga andam nang mohampak ang paghukom.

¹⁰⁵ Atua kami sa bungtod niadtong adlaw, ngani ania man dinhi si Igsoong Banks Wood, nagatungas kami niadto sa bungtod. Siguro isulti ko kini pag-usab, aron mapalig-on ang inyong pagtoo para niining linya sa pagpaampo nga andam nang ipahigayon sa sunod nga diyas, kinse minutos. Miuna lang ko niadto kang Igsoong Banks sa paglakaw. Siya'y... Sa hunahuna ko mora'g gibilin ra niya si Igsoong Ruby kaniadtong nagsakit kini. Ug samtang gasunod siya sa ako, namatikdan ko ang iyang nawong, nga namula. Milingi ako. Nahunahuna ko nga basin og medyo malisud para sa iyaha ang pagtungas sa bungtod, mao nga medyo naghinay-hinay ako. Didto mismo niadtong kadsiyertohan, ibabaw mismo sa kabungtoran nga sama *niadto*, didto mismo kon diin nagpakita ang mga Manulonda sa Ginoo. Nagpaingon kami niadto sa maong direksyon, kon diin Sila nagpakita pipila ka bulan sa wala pa kadto.

¹⁰⁶ Ug samtang nagatungas ko sa bungtod, ang Espiritu sa Dios... Sa paglingi ko, mitan-aw ako sa ibabaw sa bukid, miingon Siya, "Pudyota kanang bato, ug sultihi siya, 'MAO KINI ANG GINAINGON SA GINOO, imong makita ang Himaya sa Dios sa mosunod nga mga pila ka oras.'"

107 Gipudyot ko lang ang bato, ug miingon, “Igsoong Banks, wala ko kahibalo kung ngano,” giitsa kadto sa hangin, ug miingon ko, “MAO KINI ANG GINAINGON SA GINOO, imong makita ang Himaya sa Dios.”

Ingon niya, “Si Ruby ba ang buot ipasabot niana?”

108 Ingon ko, “Dili, sa hunahuna ko wala kini og unsa man nga kahilambigitan sa inyo, Banks o Ruby, ni usa kaninyo. Sa hunahuna ko nagaingon lang Kini, ‘MAO KINI ANG GINAINGON SA GINOO, adunay butang nga mahitabo.’”

109 Ug pagkasunod buntag samtang atua kami didto, daghan sa mga kalalaken-an, wala lang ko kabalo kung pila ba ang ania dinhi karon, diha’y dose o katorse, kinse kanamo ang atua didto. Sa kalit lang, usa ka ministro ang miduol sa ako ug miingon siya, “Igsoong Branham,” ingon siya, “ang akong ngalan *Ingon niini-ug-ingon niana*.” Miingon, “Usa man ko sa imong mga tapangabaga sa California.”

110 Ingon ko, “Nalipay ako nga mahimamat ka, sir.” Si Douglas McHughes. Ingon siya, “Ako’y . . .” Ingon ko, “Nalipay ako nga mahimamat ka.” Gilamano ko siya.

111 Miingon siya, “Bueno, karon, aduna ko’y gustong ipangutana kanimo.” Miingon . . . Sila ni Roy Roberson, nga tinugyanan dinhi; si Igsoong Wood, Terry ug Billy, ug, oh, si Igsoong Mc Anally, ug wala ko kabalo kung kinsa kadtong tanan nga atua didto. Ug ako . . . Ingon siya, “Aduna ko’y gustong ipangutana kanimo.” Ingon pa siya, “Nagahatag ba kanimo og mga panan-awon ang Ginoo sa lugar nga sama niini?”

112 Ingon ko, “Oo, igsoon, apan nagaanhi ko dinhi aron medyo mopahilayo niana, para makapahulay.”

Ug mitan-aw ako sa palibot nga nakaingon *niini*, ug nakita ko ang usa ka tambokon nga doktor nga naga-eksamin kaniya, og miingon, “Rev. McHughes, kining allergy sa imong mata sa dili madugay makapabuta na gyud sa imong mata. Gitambalan na ta ka sulod sa duha na ka tuig, ug wala na ko’y unsa man nga mahimo bahin niini.”

Ug miatubang ako sa iyaha. Ingon ko, “Ang hinungdan kon nganong gipangutana mo ako bahin niana, tungod giingnan man ka sa imong doktor, niadtong miaging adlaw, ‘Tungod kana sa allergy nga anaa sa imong mata.’” Udtong tutok na kadto, mga alas onse na, ug nagasul-ob siya og antipara. Ingon ko, “Ang hinungdan; nga nagasul-ob ka niana dili tungod sa adlaw, kondili tungod kini sa imong mata. Giingnan ka niya nga ‘mabuta na kono kanang imong mata.’”

Ug nagsugod siya nga mihilak, miingon, “Tinuod kana.”

113 Mitalikod na ko aron molakaw pag-usab, duna ko’y gihawiran nga usa ka pala kaniadto. Ug mitan-aw ako; nakita ko

siya nga nagatindog didto nga nagtan-aw kanako, ang iyang mga mata ingon na gyud ka tin-aw. Ingon ko, “Apan MAO KINI ANG GINAINGON SA GINOO, dili mabuta kanang imong mata.” Kauban ko siya nga nangayam niadtong miaging tinglagas, mas makakita pa siya og ayo kaysa sa ako ug kang kinsa man sa among grupo. Wala na siya. . .

114 Ug nakita pud nako ang usa ka tigulang nga babaye nga naghubo sa iyang medyas ug gipataas ang kilid sa iyang sayal. Miingon ang babaye, “Anak, kung makita mo si Igsoong Branham, sultih siya nga iampo ang akong mga tiil.” Ug mitan-aw ako didto sa ubos, ug ma’y gagmay’ng. . . mora og gagmay’ng mga tumor nga nagbitay sa iyang mga tiil, sa palibot niini.

115 Ingon ko, “Ang imong inahan ubanon na nga babaye. ‘Anak ko,’ nakita mo. Giingnan ka niya adisir ka migikan, nga kung makita mo ako, iampo kono nako ang iyang mga tiil. Aduna siya’y gagmay’ng mga tumor, nga mora’g, nagabitay sa tibuok niyang mga tiil.” Mora gud siya’g makuyapan.

Miingon, “Tinuod kana.”

Ingon ko, “Sultih siya nga dili na mabalaka. Mamahimong okey na ang tanan.”

116 Hinay-hinay na kong milakaw. Dayon nadungog ko ang Tingog sa Dios nga nagasulti, ang ingon, “Pahilayo, sa gilayon.”

Nagatindog didto si Roy Roberson, nahibalo ko nga usa siya ka beterano sa gubat, giagbayan ko siya, ingon ko, “Igsoong Roy, pagtago, sa ingon ka dali nga mahimo mo!”

Miingon, “Unsa ma’y nahitabo?”

Ingon ko, “Pahilayo! Pagtago!”

117 Ug hinayhinay ko nga naglakaw, gibutang ko ang akong pala, og gihubo ang akong kalo. Ug ania Siya nagaabot, ang Himaya sa Dios nga nagakunsad diha sa usa ka alimpulos nga mitapyas sa kilid sa bukid nga ingon niana, ug gipabuto ug gitay-og ang maong lugar nga ingon niana, og nangaputol ang tumoy sa mga kahoy; mga tulo o upat, lima ka piye lang ibabaw sa akong ulo. Mipaitaas kadto nga mora’g usa ka imbudo nga nakaingon niana; nagpabuto Kadto pag-usab. Ug, ania miabot Kadto, sa makatulo ka higayon.

118 Pagkahuman sa dihang mihawa na Kadto, sa ikatulo ka higayon, miduol si Igsoong Banks, og miingon, “Mao ba kadtong imong gisulti?”

Ingon ko, “Oo.”

Miingon, “Unsa man kadto?”

119 Ingon ko, “Nagpakita ang Dios diha sa mga alimpulos.” Wala ko kahibalo kung gusto ba Niya nga akong isulti sa mga tawo o dili.

120 Pagkahuman nagpadayon ako ug nag-ampo sa makadiyut. Dayon giingnan Niya ako nga puede ra nakong isulti kanila. Ingon ko, “Paghukom kini nga mohampak sa Kasadpang Kabaybayonan.” Tan-awa n’yo siya karon! Tan-awa kung unsay nahitabo pipila ka oras human niadto: miunlod halos ang Alaska. Ug karon ang tibuok butang nagakaunlod na. Nagasulod na kita sa paghukom. Gisalikway man gud ang kalooy.

121 Apan salamat sa Dios, anaa kanato ang tinago nga Pagkaon, espirituhanong Pagkaon, nga kita nagakinabuhi diha sa pagkamaayo ug kalooy sa kapadayagan ni Jesus Cristo sa niining kaulahiing mga adlaw, ginapanghimatud-an ang Iyang Kaugalingon sa taliwala sa Iyang katawhan. Amen! Misulod sila. Misulod na si Elias sa wala pa miabot ang hulaw. Salamat sa Dios nga nakasulod na ta sa wala pa miabot ang paghukom. Karon na ang panahon sa paggawas ug pagsulod, ang paggawas diha nianang mga organisasyon ug mosulod kang Cristo, usa ka panahon sa paggawas ug pagsulod para sa tanang tinuod nga mga magtotoo.

122 Bueno gitawag siya, ug nagpabilin didto. Hinumdumi, wala gyud siya mihawa niadtong sapa hangtud nga gitawag siya sa Dios.

123 Ug human nga hapit nang matapos ang hulaw, Iyang gitawag siya gikan didto, og mipaingon sa balay sa usa ka balo. Matikdi, gitawag sa Dios kining maong balo. Ug kining balo wala man siya nagpakig-uban sa mga dili-magtotoo; nga midawat sa marka sa mapintas nga mananap niadtong panahon sa hulaw. Busa Iyang gitawag siya aron... gitawag si Elias aron sa pagtabang niining balo. Aduna na lamang sila og usa ka gamay’ng tinapay, usa ka gamay’ng butang nga iyang ginakuptan kaniadto. Ug miingon si Elias, “Ihatag kana sa ako, una. Kay, MAO KINI ANG GINAINGON SA GINOO, kanang tadyaw dili gayud mahutdan ni mahutdan ang tibud-tibud, hangtud sa adlaw nga ang Ginoong Dios magapaulan sa ibabaw sa yuta.” Unahon gyud ang Dios, ang Iyang Pulong una!

124 Matikdi, aduna gyu’y harina sa tadyaw. Sa matag higayon nga moadto siya aron mokuha og harina, adunay harina sa tadyaw. Aduna pu’y lana sa tibud-tibud, sa matag higayon nga moadto siya og mokuha niini. Ngano man? Ang harina nagarepresentar kang Cristo diha sa halad-nga-pagkaon. Kinahanglan nga napahimutang sa insakto gayud ang mga galingan, aron magaling ang matag usa niadto. Ang matag paggaling sa niining harina magkapareho gayud, nagapakita nga Siya mao sa gihapon kagahapon, karon, ug hangtud sa kahangturan. Kadto mao ang Pulong, ang Tinapay sa Kinabuhi nga nagasunod sa mensahe, aron panghimatud-an ang Pulong.

125 Mao man usab karong panahona, mga higala. Mao man usab sa karong panahon, nga ang Tinapay sa Kinabuhi nga ginakaon

sa mga kaanakan, nagasunod sa Mensahe sa Dios, aron tabangan sila sa panahon sa hulaw. Unsa kaha kung motindog Siya sa atong atubangan karon? Unsa kaha kung motindog Siya sa atong atubangan karon mismo? Manglihok gihapon Siya ug mamuhat nga sama gayud sa Iyang gibuhat niadtong mga adlaw nga ania pa Siya sa unod dinhi ibabaw sa yuta. Ang Pangasaw-onon kabahin na sa Bana, ang Iglesia sama ra usab kang Cristo. “Ang mga buhat nga Akong ginabuhat pagabuhaton usab ninyo.” Ug ang Pulong mismo ang nagbuhat niini. Gisultihan Niya kita nga ang mga butang nga Iyang gibuhat pagabuhaton usab nato.

¹²⁶ Atong matikdan usab dinhi, nga kung ang Pulong ania kanato ug miabot na kanato, sama sa gibuhat Niini kang Elias niadtong adlaw, nan pagabuhaton gayud Niini ang mao gihapong butang nga gibuhat niya, magakaon siya sa mga tinago nga Butang sa Dios nga gililong sa kalibutan. Oh! Sa makausa pa, ginahimo niini ang Mensahe ug ang mensahero ingon nga usa ra. Nakaandam na ang espirituhanong Pagkaon, ug anaa na Kini sa gikatakda nga panahon karon. Ug ang matag usa kaninyo mahimong makaangkon niini nga Pagkaon kung nagatinguha kamo Niini, kung andam kamo nga mobiya gikan sa tanang pagkawalay-pagtoo sa niini nga panahon, kung andam kamo nga moduol kang Cristo, moduol diha sa Iyang saad.

Ug timan-i n’yo ang Iyang mga saad, diha sa Malaquias 4, Lucas 17:30, usab sa San Juan 14:12, ug daghan pa nga mga Kasulatan, nga nagasulti, Joel 2:28, ug sa tanan nga Iyang pagabuhaton, o 2:28, diay, kung unsay Iyang pagabuhaton sa niining kaulahiang mga adlaw. Ug kung unsa nga giingon sa propeta nga motungha ang Kahayag dinhi niining kaulahiang mga adlaw, kung sa unsang paagi Kini mamuhat, kung unsay pagabuhaton Niini, ang tanang mga Kasulatan nagatudlo gayud ngadto niining kaulahiang mga adlaw. Ug mao kana si Cristo! Kung makahimo kamo sa pagtago diha Niana karon, diha nianang tago nga Dapit, nan makakaon kamo ug makita n’yo ang pagkamaayo ug kalooy sa Dios. Kung ma’y sakit kamo, aduna gayu’y kaayohan dinha.

¹²⁷ Mahinumduman ninyo sa dihang si Eliseo, human niadto, nagtawag og . . . Human nga nakaangkon siya niadtong halad-nga-pagkaon, si Cristo, ug gipakaon ang panimalay sa maong balo pinaagi Niini. Matikdi, human niadto nga nagtawag siya og kalayo panaug gikan sa kalangitan, ug uban pa, ug nagpamatuod nga gipadala siya, sa Dios, ang Espiritu sa propeta.

¹²⁸ Matikdi, didto sa kawanangan, samtang nagahigda siya didto ilalum sa kahoy’ng juniper, usa ka Manulonda ang mikanaug nga nagdala niadtong mao ra nga matang sa harina, ug nagluto og pipila ka tinapay ug gipakaon siya. Ug pagkataudtaud gipakatulog niya siya pag-usab, ug gipukaw siya, ug daghan pang tinapay ang giluto didto para kaniya. Ug mipanaw siya nga ma’y kusog pinaagi niadtong mga tinapay

sulod sa kuwarenta ka adlaw. Himaya sa Dios! Siya mao sa gihapon kagahapon, karon, ug hangtud sa kahangturan. Oh, gihigugma gayud nato Siya, ang espirituhanong Pagkaon sa panahon Niini!

¹²⁹ “Dili matarung nga pagakuhaon ang tinapay para sa mga anak ug ipanghatag kini ngadto sa mga iro.” Dili ba gisulti man ni Jesus ang mao rang butang ngadto sa babayeng Sirofenisa? Gipadala man gud Siya alang sa Mga Iya. Husto kana. Ug sila mao ang Iyang giadtoan...wala gayud Siya miadto sa mga Gentil.

¹³⁰ Ug karon niining panahona ginaduaw na Niya ang mga Gentil sa ilang panahon, ug dili matarung...

¹³¹ Moingon mo, “Ngano man nga wala nagakadangat ang Mensahe dinhi niining dagkung mga lugar, niining dagkung mga krusada, sama sa taliwala sa mga denominasyon?”

¹³² Dili kini ilang Pagkaon. Dili kini para sa tawag lang, nga iglesia, nga Pagkaon. Kondili Pagkaon kini sa Pangasaw-onon. Kini mao ang espirituhanong Pagkaon sa panahon. Makapaluod kini sa ilaha. Tambok ra kaayo kini para kanila. Kita n’yo? Kita n’yo? Dili mo—mo—mo mahimo kana. Apan, para sa mga anak, Tinapay Kini, Kinabuhi Kini, si Jesus Cristo Kini nga mao sa gihapon kagahapon, karon, ug hangtud sa kahangturan.

¹³³ Basin malangan na kaayo ta kung dili pa nato sugdan ang linya sa pagpaampo karon, busa iduko nato ang atong mga ulo sa makadiyut.

¹³⁴ Minahal nga Dios, Pagkaon alang sa gikatakda nga panahon, espirituhanong Pagkaon. Butang nga ang kalibutan wala gayu’y hibangkaagan. Niadungog gayud namo ang among Ginoo nga nagasulti niadtong gabhiona, o niadtong adlaw didto sa Samaria, sa mao ra nga dapit nga giadtoan ni Eliseo ug miingon, “Aba, ang tun-og dili mahulog hangtud nga igasulti ko kini.” Atua pud si Jesus nagatindog didto nga nagaingon sa Iyang mga tinun-an.

 Miingon, “Magtutudlo, nganong dili man Ka mokaon?”

 Miingon Siya, “Aduna Ako’y Pagkaon nga wala ninyo masayri.”

¹³⁵ Tinuod gayud, Ginoo, nga ang Iyang Pagkaon mao ang buhaton ang kabubut-on sa Dios, aron makita ang mga buhat sa Dios nga madayag sa Iyang panahon. Atua Siya aron siguradohon nga nahitabo kini. “Wala Ako’y bisan unsa nga ginabuhat gawas kon ipakita una Kanako sa Akong Amahan. Kung unsa ang ginapakita Kanako sa Amahan, kana ang ginabuhat Ko.”

¹³⁶ Ug, Amahan, mao sa gihapon kini sa karong panahon. Ang Iglesia, ang tinuod nga magtotoo, ang Lawas sa mga magtotoo, adunay makuha nga Pagkaon, espirituhanong Pagkaon, nga ang

mga nagapatawag sa ngalan lang wala gayu'y hibangkaagan. Walay unsa mang nahibaloan ang kalibutan mahitungod niini nga Pagkaon, Amahan. Apan ang Imong Iglesia, ang Imong katawhan, ang Pangasaw-onon sa Imong Anak, gusto gayud Kini.

¹³⁷ Aduna kami'y kaadtoan para sa kaayohan sa among mga lawas kon napakyas na ang mga doktor. Aduna kami'y kaadtoan para niini. Usa kini sa mga Pagkaon sa Dios, nga Iyang gihatag sa Iyang Iglesia, ug gisaad kini sa kaulahiing mga adlaw ngadto sa Iyang nagatoo nga mga anak. Amahan, tabangi intawon kami nga mamahimong mga anak nga nagatoo, kay ang tanang butang mamahimo alang sa mga magtotoo. Itugot kini, Minahal nga Dios. Amo kining ginapangamuyo sa Ngalan ni Jesus. Amen.

¹³⁸ Nagatoo ko nga giingnan na ko ni Billy nga nanghatag sila og mga prayer kard. Kung adunay makasulti sa ako sa letra nga anaa sa prayer kard, kana lang ang akong gikinahanglan. [Adunay nagaingon, "C."—Ed.] C, sige, tawgon nato ang C, uno, sa pagsugod, hangtud nga masugdan ko na ang atong linya. Kita n'yo, karon, tingali'g nagkatag sila sa tibuok bilding. Karon, kung ang tanan. . . Bueno, kita n'yo, sulayan ko kini. Wala ko kabalo kung mahimo nato kini o dili. O kaha magtawag na lang ta diha sa linya; pabilin lang mo sa paglingkod. Walay sapayan kanako. Kung mas gusto ninyo nga mosaka dinhi sa entablado, o kaha magkaaduna og usa ka linya nga pagatawgon, walay sapayan, bisan unsa lang niining duha ka paagi. Basta nagasalig lang ko sa Espiritu Santo. Nagasalig ako Kaniya nga paluyohan kining Pulong nga akong gikawali.

¹³⁹ Igsoong George Wright, nagatoo ako Niini. Sukad niadtong usa pa ako ka batan-ong lalaki, nga nagaadto sa inyong balay daghan nang mga tuig ang milabay, nagapaminaw ko niadtong langgam nga whippoorwill nga nagatugdon sa kahoy, hangtud karon nagatoo gihapon ako sa mao ra mismo nga Mensahe. Nagatoo ko nga mao gihapon Kini.

¹⁴⁰ Bueno, nakita ko nga ginaplastar na nila dinhi dapit ang linya sa pagpaampo. Sige, prayer kard C, numero uno, dos, tres, kuwatro, singko, ang una nga moduol ug motindog dinhi mismo. Kung dili man kamo makatindog, ipataas lang ninyo ang inyong mga kamot, moduol ang pipila kanila para alsahon kamo. [Adunay usa nga nagapakig-istorya kang Igsoong Branham—Ed.] (Unsa gani kadto? Oo. Uh-huh.) Prayer kard C, uno, dos, tres, kuwatro, singko. Ug karon matikdi n'yo, kamo nga walay prayer kard. . .

¹⁴¹ Bueno, wala na ako nakapahigayon og ingon niini nga klase sa linya sa pagpaampo sa dugay, dugay na nga panahon. Pila man ang nakahinumdom sa sugo kanako kaniadtong gitukod nato ang tabernakulo dinhi? Ang ingon, "Buhata ang buluhaton sa usa ka ebanghelista." Pero wala giingon nga usa ako ka

ebanghelista. Ang ingon, “Buhata ang buluhaton sa usa ka ebanghelista,” kita n’yo, “kay moabot ang takna nga pagausabon kana.” Taliabot na kanang taknaa. Bueno. Karon, dinhi niini, Siya . . .

¹⁴² Dili mo man puedeng dunganon ang duha o tulo ka managlahi nga mga ministerio, ang pag-pastor ug pagpang-ebanghelyo, sa mao rang higayon. Dili ka puede nga mahimong usa—usa ka propeta ug tingali usa ka pastor, sa mao rang higayon, kita n’yo, tungod aduna man ka’y nagkalainlaing mga buluhaton, nagkalainlaing ministerio.

¹⁴³ Apan gihatag kanako sa Ginoo kung unsa gyud ang angay kong buhaton sa akong Mensahe. Pero miingon Siya, “Buhata ang buluhaton sa usa ka ebanghelista, tumana ang imong buluhaton ingon nga ministro, kay moabot ang takna nga dili na sila molahutay sa maayong Pagtulon-an.” Ambot kung wala pa ba kaha kana miabot karon! Gibalibaran na ako sa matag iglesiang denominasyon. Tungod dili na man sila molahutay sa maayong Pagtulon-an. “Kondili uyon sa ilang mga kailibgon ipasulod nila ang kaugalingon nilang mga magtutudlo, ug mopaingon sila sa mga sugilanon lamang. Ug magbuhat sila og mga dagkung butang aron sa pagpahimulos sama kang Jambres ug Jannes nga misupak kang Moises, apan madayag ra ang ilang kabuang.” Kita n’yo? Kita n’yo? Bueno, ang mga pagsundog-sundog! Nakita n’yo kung unsa nga si Jambres . . .

¹⁴⁴ Ug, nasayod ang Dios sa Langit, nga napahimutang na kana dinha mismo sa ulohang- . . . (sa tabernakulo) . . . -bato sukad niadtong 1933, nakasulat gani kini diha sa usa ka panid sa Biblia, napahimutang didto mismo. Tan-awa kung unsa nga nabuhat na nila kini. Tan-awa kung unsa na ang nahitabo. Mga pagsundog-sundog, eksakto gayud. Miingon, “Pasagdi sila, madayag ra man ang ilang kabuang sa mao rang paagi sama kang Jambres ug Jannes.” Ania na kita niana nga panahon.

¹⁴⁵ Nakita ko kaniadto ang simbahan sa dihing gipahimutang namo ang ulohang-bato, ang mga tawo anaa na sa mga kurdiso ug sa tibuok palibot, nanagtindog na lang dinha palibot sa bungbong sa tabernakulo. Mao kana. Miingon sila, niadtong gitukod pa kini, ang mga tawo dinhi sa siyudad, miingon, “Sulod sa unom ka bulan . . .” Kita nga aduna lang og usa ka dolyar ug otsenta’y sentimos aron makapatukod og usa ka tabernakulo, daghang mga mekaniko ang nagdesisyon nga mamahimo kining ilang garahianan. Apan kini usa gihapon ka toril sa karnero alang sa mga Karnero sa Dios.

¹⁴⁶ Uno, dos, tres, singko, sais, siete, otso, nuebe, diyes. C, sais, siete, otso, nuebe, diyes. Sige.

¹⁴⁷ Karon, “Ako mao ang Ginoo nga nagtanum niini, Ako kining pagabisbisan adlaw ug gabii kay tingali’g adunay moilog niini gikan sa Akong mga kamot.” Tan-awa n’yo ang

pagpanaway! Walay denominasyon nga misuporta Niini. Walay mga iglesia dinhi sa tibuok nasud nga miuyon Niini. Walay Pentecostal sa nasud, walay unsa pa man nga mitabang Niini. Ang tanan misupak bahin sa maong bautismo sa tubig, ang tanan misupak gayud sa tanan na niining uban pang butang. Bisan sa kaugalingon kong pamilya, ang kaugalingon kong amahan gipagawas ako sa pultahan, gisulod ko ang akong mga sinina sa usa ka gamay'ng sudlanan nga papel ug milakaw ko ug mipuyo sa New Albany. Oo.

Apan sa daghan nang mga katalagman, pag-
antus ug mga laang,
Nga ako nang naagian;
Grasya ang mao'y naghatud kanako nga hilwas
hangtud niini nga punto,

Singkwenta'y-sais anyos na ako, ug dili magdugay
kinahanglan ko nang motabok sa suba.

Grasya ang padayon nga magadala kanako.
Pag atua na ako didto napulo ka libo nga
katuigan,
Mahayag nga nagadan-ag sama sa adlaw;
Dili na kita pagakulangon sa mga adlaw sa
pag-awit og pagdayeg sa Dios
Kay sa kaniadtong una kitang nagsugod.

Oh, gihigugma ko gayud si Jesus! Siya ang tanan-tanan
alang kanako!

¹⁴⁸ Oh, bueno, pila na ba ang akong . . . ? Asa gani ako mihunong,
diyes? Mahimo pa ba kitang magtawag og dugang? Sige. Unsa
gani kadto, diyes, kinse? Sige. C, diyes hangtud kinse, asa man
kamo, kung makatindog kamo ug makaduol. Unsay sulti? Huh?
Okey. C, kinse hangtud baynte, kung ingon-ana. Mao kana ang
C, kinse hangtud baynte. Kana'y napulo pa ka tawo. Makita
nato . . . Inyo mang makita—makita kon asa na ang linya dinha,
ayaw nato sila—sila nga magkaguot. Ug atong . . . Bueno.

¹⁴⁹ Karon ihatag n'yo kanako ang inyong bug-os nga pagtagad;
dili na ta maglangan. Apan, karon, oh, daw sa unsa nga takna,
daw sa unsa nga panahon! Ako—gitinguha ko nga mahimo unta
sa tanan nga higugmaon ang Ginoo. Ako—gitinguha ko nga
kitang tanan makadangat unta niana nga punto nga maamgo
ang potensyal niining higayona. Sulayan nato kini. Ihatag lang
ninyo sa ako ang inyong pagtagad.

¹⁵⁰ Unsa—unsa ba ang ginapaningkamotan natong buhaton
dinhi? Ginapahimutang nato ang Pulong sa Dios sa usa ka
pagsusi. Mao sàb mismo ang gibuhat ni Elias kaniadto, mitungas
ngadto sa bukid human niyang nahibaloan nga gipadala siya
sa Dios aron buhaton kadto. Miingon siya, “Karon pamatud-
an nato kung kinsa gyud ang Dios, tugoti nga ang Dios nga
magatubag pinaagi og kalayo mao ang Dios.”

151 Ug nanagsamad ang mga pagano, oh, miingon, “Bueno, siguradong, dili. . .” Nasayod man ang—ang mga pagano nga walay kalayo nga mahulog, busa nanagsinggit sila ug kung unsa na lang ang gipangbuhat.

152 Apan nasayod si Elias nga mahulog gyud kadto, tungod aduna man siya’y usa ka panan-awon gikan sa Ginoo.

Moingon mo, “Aduna siya’y panan-awon?”

153 Oo, sir! Sa dihang napahimutang na niya ang tanan sa kahan-ayan, miingon siya, “Ginoo, gibuhat ko kining tanan sumala sa Imong sugo.” Ug pagkahuman hinay-hinay nang nahulog ang kalayo. Pag ang Pulong sa Dios bug-os gayud nga ginatuman, nan buluhaton sa Dios nga atimanon ang tanang uban pa niini. Ang ginahangyo lang Niya kanimo nga ipahimutang kini dinha. Ug siguradoha nga tinawag gyud ka para ipahimutang kini dinha. Kita n’yo? Ug kung tinawag ka man, nan Siya na ang moatiman sa tanang uban pa niini.

154 Bueno, dinhi niini nga linya magaagi ang mga tawo nga akong igaampo. . . Karon, bueno, hapit na kamong moabot nganha sa bungbong karon, sige, diha na sa linya aron makasugod na. Karon, una, labing menos sa kon asa man dinhi sa bilding, ma’y pipila ka tawo. . .

Pila man ang ania nga ma’y sakit ug walay prayer kard, ipataas ang inyong kamot. Kita n’yo, halos tanan. Karon, kabalo mo nga kung ang atong Ginoo. . . Ug nagatoo ko nga buhaton gayud Niya, kung Siya mao sa gihapon kagahapon, karon, ug hangtud sa kahangturan. Nagpahigayon man pud Siya og mga linya sa pagpaampo kaniadto. Nagaduol Kaniya ang mga tawo diha sa hataas nga mga linya, panon sa mga tawo, gihikap Niya sila, gipanalanginan Niya sila. Ngani mihunong Siya usa ka higayon ug miingon, “Kinsa’y mihikap Kanako?” Mitan-aw sa palibot, og gisultihan ang usa ka babaye kung para sa unsa nga gihikap niya Siya; ug miingon nga nawala na ang talinugo sa babaye, nga ang iyang pagtoo ang nakapaayo sa iyaha.

155 Unsa kaha kung milingi ang babaye ug miingon, “Bueno, wala ko kabalo, Ginoo, dugay na nga panahon kining ania kanako”? Dili unta kadto mahitabo. Dili, dili gyud unta kadto mahitabo. Dili.

156 Unsa kaha kung gisultihan Niya ang babayeng Sirofenisa, “Tungod niining pulong nga gisulti mo, ang imong anak nga babaye, mipahawa na sa iyaha ang yawa,” unsa kaha kung miingon, “Bueno, karon, Ginoo, ako—gusto ko nga buhaton Mo kini sa *ingon-ani* nga paagi”? Ang—ang yawa tingali’g atua sa gihapon sa maong batang babaye. Apan naglaum na man ang maong babaye nga makita ang iyang anak sumala sa pagkasulti ni Jesus nga makita niya kini.

157 Bueno, gisultihan pud Niya kita, “Kung mahimo mong toohan! Kung magamongon ka niining bukid, ‘Bumalhin ka,’

ug dili kini pagaduhaduhaan sa imong kasingkasing, kondili toohan nga mamatuman gayud kung unsa ma'y imong giingon, maangkon mo kini. Pag mag-ampo kamo, toohi nga madawat ninyo kini, igahatag kini kaninyo.” Pagkaanindot nga saad!

¹⁵⁸ Karon ang tawo nga nagawali sa pangkatilingban nga ebanghelyo wala gayud nagatoo niana. Moduol siya sa pultahan, motan-aw sa sulod, o motindog dinha, ug moingon, “Bueno, lahi na usab nga pundok sa mga holy roller,” ug molakaw na. Kita n'yo? Apan wala siya masayod nga kini mao ang tinago nga Pagkaon. Wala siya masayod nga kini mao ang tinago nga Butang nga gililong kaniya. Wala siya masayod niini. Kini'y—kini'y—kini'y makaluluoy gayud, usa ka panghunahuna nga hubo, makaluluoy, buta, ug wala mahibalo niini. Kita n'yo? Malisud kana.

¹⁵⁹ Oh Dios, itugot nga mamatay una ako, apan ayaw intawon itugot nga mahimo akong ingon niana. Mas gustohon ko pa nga mamatay (oo, sir) kay sa buhaton kana. Sa hunahuna ko mas gustohon gyud sa matag usa kanato nga ingon niana, dili ba?

¹⁶⁰ Apan, karon, gisaad sa Dios kanato kining mga butanga sa kaulahiang mga adlaw. Sa Malaquias 4, gikaingon nga si Jesus Cristo mokanaug ug ipahisama ang Iyang Kaugalingon diha sa tawhanong unod sama sa Iyang gibuhat kaniadto sa Sodoma. Husto kana. Ug gikaingon nga ang kalibutan maanaa na sa kahintang sa Sodoma. Ug miingon, “Maingon sa nahitabo kaniadto, ang Anak sa tawo igapadayag na nianang adlaw.” Kita n'yo, kining Lalaki nga mikanaug diha sa porma sa usa ka tawo, nga mao si “Elohim,” kang Abraham, sa wala pa miabot kining gikasaad nga anak. Matikdi kung unsa kadto, miingon si Abraham nga ang Dios kadto. Ug miingon ang Biblia nga adunay tulo ka lalaki nga miadto kaniya, nga naabogan ang ilang mga bisti, sa pagpanaw, nanglingkod ug nangaon nga sama sa mga tawo. Ug miingon si Jesus, “Sa panahon nga ang kalibutan maanaa na sa kahintang sa Sodoma, nianang panahona igapadayag sa Anak sa tawo ang Iyang Kaugalingon pag-usab.” Dili nga Anak sa Dios, kondili nga Anak sa tawo, kita n'yo, igapadayag ang Iyang Kaugalingon.

¹⁶¹ Karon timan-i kana sa kung unsay giingon sa maong kaulahiang propeta, “Ania karon, Akong ipadala kaninyo si Elias nga propeta, ug iyang ipasig-uli ang—ang mga kasingkasing sa mga anak balik sa mga amahan.” Kita n'yo? Usa ka Mensahe nga magapabalik kanila ngadto sa Biblia, ug igapadayag sa Anak sa tawo ang Iyang Kaugalingon nianang adlaw. Ug nianang adlaw sa pagtingog sa ulahing kapanahonan sa iglesia, sa ikapitong manulonda, ang mga tinago sa Dios mapadayag na nianang adlaw. Ang Pito ka Selyo pagabadbaron na. Ang mga tinago mahitungod sa tanan niining mga iglesia ug mga ingon nianang butang, kung giunsa nga

nahitabo ang mga niini, ug kung unsa ang nah- . . . kung giunsa, kung unsa ang nahitabo.

¹⁶² Kita n'yo, wala sila mahibalo Niini. Miingon si Jesus, "Kamong buta nga mga Fariseo!" Miingon, "Kung ang buta magaagak sa buta, dili ba sa gahong mangahulog silang duha?" Kita n'yo, mao kana'y hinungdan nga dili Kana makita niadto nga mga tawo.

¹⁶³ Ang tinago mahitungod Niini, mao, ang mga Selyo, ang matag usa niadto nga mga kaiglesiahan nagtukod og organisasyon ug misulod niadto, ug mao kana ang usa sa mga tinago nga butang nga dugay nang sayup sa atubangan sa Dios. Nakita mo ba kadto, Doktor Lee? Kita n'yo, tan-awa. Mao gyud. Mao kana nga butang dinha mismo. Mao kana ang usa sa mga tinago. Nag-organisa sila ug, kita n'yo, ug bug-os gayud nga wala na sa kabubut-on sa Dios. Ug igapahayag kana sa kaulahiing mga adlaw, ug magaagak sa mga tawo, dili paingon sa usa ka kredo o usa ka denominasyon, kondili pabalik sa tinuod nga Pulong. Ug ang tinuod nga Pulong mahiabot sa usa ka grupo sa mga tawo, ug igapadayag sa Anak sa tawo ang Iyang Kaugalingon diha sa ilang taliwala, "mao sa gihapon kagahapon, karon, ug hangtud sa kahangturan."

¹⁶⁴ Oh, my! Oh, gusto ko gayud kana. Gusto ko—gusto kong ipasigarbo Siya. Gusto ko nga—nga himoon Siyang daku sa atubangan sa mga tawo. Dili ko na diay kinahanglang himoon Siya nga daku; daku na Siyang daan. Ngani Siya'y ingon ka taas nga dili n'yo Siya mahimong lagpasan, halawom kaayo nga dili n'yo Siya matugkad, halapad kaayo nga dili n'yo Siya mahimong palibotan, ug bisan pa niana aduna kamo'y lawak sulod sa inyong kasingkasing alang Kaniya. Mahimo n'yo bang dawaton Siya? Pagka-kahibulongan gayud sa atong Ginoo! Bueno.

¹⁶⁵ Karon magmahilomon gayud kita, ang tanan. Karon, naghigot na kita mahitungod Niini. Ug karon ang pangutana, tinuod ba Kini? Karon, tingali'g dunay pipila ka mga bag-o han dinhi. Mahimo kong isulti kung . . . sa inyo, kung si Cristo mao sa gihapon kagahapon, karon, ug hangtud sa kahangturan, unsa ma'y Iyang buhaton niining taknaa? Buhaton Niya ang mao gihapong butang nga Iyang gibuhat sa ania pa Siya dinhi kaniadto. Tinuod ba kana? Ang pagtoo sa mga tawo mao'y mohikap sa Iyang bisti, ug molingi Siya. Sama sa gibuhat Niya sa babaye nga atua sa atabay, ug sa gibuhat Niya sa uban pang mga lugar, ug naila Niya ang ilang mga hunahuna.

Karon, moingon mo, "Mahimo ba Niya akong ayohon?"

¹⁶⁶ Miingon ang Iyang Pulong nga gibuhat na Niya kana. Apan ang punto niini, mao'y aron ipaila ang Iyang Kaugalingon nga ania Siya.

¹⁶⁷ Bueno, kung magpakita man Siya kanato sa pisikal nga lawas, nga eksaktong kapareho gayud sa kang Hofmann nga

drowing nga *Ulo ni Cristo sa edad nga Traynta'y-tres*, ug nagadagayday ang dugo gikan sa Iyang kamot, ug uban pa, ma'y mga agi sa lansang sa kinatibuk-an Niya, dili ko kana dawaton. Dili, dili. Dili, dili. Pag moabot Siya, Mismo, “Ang tanang mata makakita Kaniya, ang tanan magasugid Kaniya; ug maingon nga ang kilat magakilat gikan sa Sidlakan paingon sa Kasadpan, maingon man usab kini.” Kita n’yo? Mao nga wala kita nagatoo niining mga kulto ug mga sekta. Kondili nagatoo kita nga ang Dios mao ang Pulong.

¹⁶⁸ Apan ginapapuyo Niya ang Iyang Kaugalingon, ginagamit ang inyong lawas ug ang akong lawas, ug ginahatagan kamo og mga gasa, ginahatagan ako og mga gasa, ug pinaagi niini nga mga gasa ginapaila Niya ang Iyang Kaugalingon. Mao kana ang tinago nga Pagkaon. Bisan unsaon pa Niya sa pagpaila sa Iyang Kaugalingon pinaagi kanako, kinahanglan gyud ninyong toohan Kini, mao nga kinahanglan ninyong makabaton og gasa sa pagtoo, usab, aron toohan Kini. Nagatoo ba kamo niana? [Nagaingon ang kongregasyon, “Amen.”—Ed.] Ug karon kung ipadayag Niya ang Iyang Kaugalingon sa ingon-ana nga paagi, toohan n’yo ba Siya? [“Amen.”] Sa tibuok n’yong kasingkasing, toohan n’yo ba Siya? Oh, pagkaanindot gayud, nagahulat lang ako Kaniya, nagahulat lamang nga makita kung unsay igasulti Niya.

¹⁶⁹ Aniyay usa ka lalaki nga nagatindog dinhi. Wala ko pa siya nakita sukad-sukad sa tibuok kong kinabuhi, sa nahibaloan ko. Mora og maayo, kusgan, himsog man siya nga tawo, ug tingali mao gayud, ako—ako—wala ako kahibalo. Apan nagatindog siya dinha. Karon, mahimo kong pandongan og mga kamot kana nga lalaki ug mag-ampo para kaniya, og pangutan-on siya kung mooto ba siya. Mahimong motindog siya dinhi ug sultihan ako, moingon, “Ako—ako—buot ko nga mag-ampo ka para kang *Ingon niini-ug-ingon niana*. Ug aduna ako’y—aduna ako’y problema sa lapa-lapa. Nagasakit ang akong ulo, kanunay. Aduna pud ko’y ulcer sa tiyan ko,” o unsa man. Siya—siya, wala ako mahibalo. Mahimo niyang isulti ang unsa man nianang mga butanga.

¹⁷⁰ Moingon pud ko, “Sige, sir, igsoon. Ipandong ko ang akong mga kamot nganha kanimo ug mag-ampo para kanimo.” Okey lang gayud kana. Eksaktong ingon niana man ang atong gibuhay sa tanang nangaging panahon. Husto ba?

¹⁷¹ Apan, hinumdumi n’yo, miingon si Jesus nga mamahimong lahi gayud sa oras na sa Iyang Pag-abot, sama sa mga adlaw sa Sodoma kaniadto. Ug ang Lalaki kaniadto nga miabot, nakatalikod Siya sa balongbalong kon diin si Sarah, ug miingon Siya, (dili “Abram,” ha) “Abraham.”

¹⁷² Kita n’yo, Abram pa siya, sa miaging adlaw kaniadto. Apan nakakita siya og panan-awon, ug gisultihan siya sa Ginoo nga,

“Usabon Ko ang imong ngalan.”

173 Ug ania ang Ginoo, Mismo, diha sa porma sa usa ka tawo, nagakaon ug nagainom kauban siya. Miingon, “Abraham, asa ba ang imong asawa, nga si Sarah?” S-a-r-r-a-h; dili S-a-r-r-a.

Ingon siya, “Anaa siya sulod sa balongbalong, sa likod Mo.”

174 Miingon, “Pagaduawon Ko ikaw, sumala sa Akong saad baynte-singko ka tuig na ang milabay.”

175 Ug medyo mikatawa si Sarah sa iyang kaugalingon. Miingon Siya, “Mikatawa si Sarah sulod sa balongbalong bag-ohay lang, nga miingon, ‘Unsaon man pagkahitabo niining mga butanga?’” Uh-huh. “Aduna ba’y butang nga malisud sa Dios?” Kita n’yo? Wala. Wala, sir.

176 Bueno miingon Siya, nagsaad si Jesus nga, “Siya, ang Anak sa tawo,” nga mao ang Pulong, (nagatoo ba kamo niana?) “moabot sa kaulahiing mga adlaw ug igapadayag ang Iyang Kaugalingon sa panahon nga ang kalibutan sama na sa Sodoma og Gomorra.” Nagatoo ba kamo nga husto kana?

177 Sa dili pa kita mohimo og usa ka pag-ampo, mag-ampo sa ang pipila kaninyo dinha ug hibaloa n’yo kung ang Anak sa tawo mao ba sa gihapon kagahapon, karon, ug hangtud sa kahangturan. Pangutana lang kung mao ba gyud Siya, moingon, “Ginoo, ang maong tawo wala makaila kanako, apan nasayod ako nga Ikaw ang mao sa gihapon kagahapon, karon, ug hangtud sa kahangturan,” hibaloa n’yo kung isulti ba Niya kana sa inyo.

Oo, sir. Karon ihangad n’yo ang inyong ulo sa makadiyut lang.

178 Anaa kini sa akong luyo. Usa kini ka bata. Mora kini’g nagadilaab sa kainit karon tungod sa hilanat. Usa kini ka batang babaye. Dili ka taga-dinhi sa lungsod. Adunay sakit sa tiyan ang maong bata. Mao gayud. Magtoo lamang.

179 Karon, mao ba kana ang gisulti Niya nga Iyang buhaton? Wala ko pa nakita sukad-sukad ang maong tawo sa tibuok kong kinabuhi. Nasayod niana ang Dios sa Langit.

180 Kining lalaki dinhi, mora siya og kusgan kaayo ug himsog. Apan nakita n’yo ba dinha kanang landong sa ibabaw niya? Ang buot ipasabot niana, gawas kon tabangan siya sa Dios, dili na siya magdugay dinhi. Aduna siya’y kanser. Anaa kini sa imong бага.

Karon, ania ang Anak sa tawo.

Aduna pud siya’y kabug-aton sa iyang kasingkasing para sa usa ka batang lalaki, usa ka gamay’ng bata. Husto ba? Nagatoo ka ba nga mahimong isulti kanako sa Dios kung unsay problema sa maong bata? [Nagaingon ang igsoong lalaki, “Nasayod ko nga mahimo Niya.”—Ed.] Mahimo gayud Niya. Aduna siya’y ginagmay’ng mga pag-ataki nga makuyapan siya

tungod sa mora'g usa ka matang sa epilepsy. Ngani bag-ohay lang siyang giataki. [“Kaganinang buntag.”] Husto kana, kaganinang buntag. Ug nagatoo ka ba nga mabuhi ka pa aron amumahon kana nga bata, ug mamaayo na siya?

¹⁸¹ Asa man si Charlie Cox? Asa siya? Charlie, asa ka? Abi ko og ania siya karong gabhiona. Ania ra diay, si Charlie. Gary, asa man ka? Larry, ania ba siya? Ang iyang anak nga batang lalaki nagkaaduna man pud og ingon niana, mao ra gayud mismo. Asa man ka, Larry? Duol sa dinhi kadali. Bueno, ania na. Kining batang lalaki dinhi aduna pu'y mao ra nga sakit. Suod kaayo nako nga higala ang iyang amahan ug inahan. Pila na ka tuig ang milabay atua ako didto, ug ginaataki kining batang lalaki, makuyapan gayud ug mawad-an og panimuut. Epilepsy kadto. Nakita ko kadto sa maong batang lalaki, og nangamuyo ko sa Dios nga ayohon siya. Wala na siya giataki ni kausa sukad niadto. Iya kanang amahan; ang inahan pud niya nagalingkod dinhi sa kon asa man; ug ania ang batang lalaki, mismo.

¹⁸² Karon nagatoo ka ba, sir? (Salamat, Larry.) Nagatoo ka ba, sir? Hinaut nga itugot sa Dios sa Langit ang mao ra usab nga butang para kanimo, ug nga mabuhi ka pa aron padakuon ang maong bata. Panalanginan ka sa Dios.

Mag-ampo kita.

¹⁸³ Minahal nga Dios, tabangi intawon siya. Ginaampo ko nga maanaa kaniya ang Imong kalooy ug grasya ug panalangini siya. Sa Ngalan ni Jesus.

¹⁸⁴ Balik ka na sa Louisiana karon, nga malipayon, og dayega ang Dios tungod kaniya.

¹⁸⁵ Oh, oo, taga-Louisiana siya, sigurado gayud, dapit sa ma'y Lake Charles. Oo. Kita n'yo, maila ko ang inyong mga hunahuna karon. Dalayon ang Dios!

¹⁸⁶ Bueno, nagapangamuyo ka og usa—usa ka maayong butang, ginatinguha mo nga makabaton og anak. Aduna ka na'y mga anak, pipila ka anak, pero gusto nimo og usa pa. Hinaut nga itugot kini sa Dios sa Langit para kanimo, igsoon kong babaye. Umari ka, gusto ko lang magpandong og mga kamot.

¹⁸⁷ Minahal nga Dios, ihatag mo unta sa babaye ang tinguha sa iyang kasingkasing, tungod kay usa man kini ka mahinungdanon nga katuyoan. Sa Ngalan ni Jesus. Amen.

Karon lakaw na og angkona ang maong bata.

¹⁸⁸ Ang Dios usa ka buutan nga Dios. Nagatoo ba kamo niana? Nasayod Siya sa tanan nga atong gikinahanglan. Ginahatag Niya ang matag panginahanglan nato kung toohan nato kini. Siya miingon, “Kung mahimo mong toohan!”

¹⁸⁹ Nalamano na ta ka sa kon asa man. Dili lang nako matiman-an kung asa, pero nalamano ko na ikaw sa kon asa man. Dili lang gyud nako matiman-an kung asa, pero basta anaa kita

sa usa ka lugar, karong adlaw sa kon asa man, pero wala ko kahibalo kung asa. Apan dili man bahin sa kung asa, ang gianhi nato dinhi para hisgotan. Ania ka para isulti mo ang mahitungod sa, o para mag-ampo, buot mo nga mag-ampo ako para sa laing tawo. Husto kana. Wala siya dinhi. Atua siya sa Georgia, nagmasakiton. Dili lamang siya nagmasakiton, sa pisikal, kondili nagmasakiton pud siya sa espirituwal; ang imong ig-agaw. Nagatoo ka ba nga ang Dios na ang bahala niini tungod kay mibarug ka para sa iyaha? Nagatoo ba gyud ka? Duol ngari ug dungan kitang mag-ampo.

¹⁹⁰ Minahal nga Dios, itugot Mo unta sa niini nga lalaki ang tinguha sa iyang kasingkasing, aron nga maadtoan niya ug makaplagan kining maong lalaki nga nagatuaw sa Dios. Ginapangamuyo ko kini sa Ngalan ni Jesus. Amen.

Panalanginan ka sa Dios. Ayaw pagduhaduha. Tumoo ka sa tibuok mong kasingkasing.

¹⁹¹ Kumusta ka? Dili ingon nga wala ko gilamano ang imong kamot kaganina, sa dihang gitunol mo ang imong kamot, aduna man gud ko'y unsa man nga namatikdan. Usa kadto ka landong, mangitngit gayud ug itum. Mao kadto'y hinungdan. Nasayod ko nga kon nahawiran ko pa ang imong kamot, mahibaloan ko kini sa ingon nianang paagi, kita mo. Pero usa kini ka kanser. Nagatoo ka ba nga ma'y kasarang ang Dios para wagtangan kini? Anaa kini sa imong suso, sa wala nga bahin. Gusto mong mobalik sa Carolina ug dayegon ang Ginoo tungod nga naayo ka na, di ba? Nasabtan mo ba ang buot kong ipasabot? Mag-ampo kita.

¹⁹² Minahal nga Dios, sa Ngalan ni Jesus Cristo, ang Usa Nga ania karon; ingon nga nagakaon ang mga anak sa Tinapay sa Dios, hinaut nga kini nga anak malipay usab sa pagtoo, sa Tinapay sa Dios nga Iyang gihatag kaniya karon alang sa iyang kaayohan. Hinaut nga mopauli siya nga mamaayo na, sa Ngalan ni Jesus. Amen.

Panalanginan ka sa Dios, igsoong lalaki. Tumoo ka sa tibuok mong kasingkasing.

Kumusta ka?

¹⁹³ Kahibulongan ba kini nga kahigayonan? Daw sa unsa nga anaa gayud sa mga tawo ang pagkahingangha. O, tingali'g ang tingog niini, sa akong pangdungog, mora og ingon niini, "Whew!" Nagakabanha gayud, nga mora'g, "Whew," mora'g ingon niana, kita n'yo. Kini mao ang Tinapay sa mga anak. Kita n'yo? Inyoha Kini. Para sa inyoha Kini. Dili Kini para sa ako; para Kini sa inyo. Mapasalamaton gayud ako, karong orasa mismo, dili ko. . . okey ra ako, sa nahibaloan ko; apan Tinapay Kini para kanako, usab, pag manginahanglan ako. Tinapay Kini para kaninyo. Pagpadasig Kini. Kaninyo nga mga walay sakit, ginadala gayud niini ang atong mga kasingkasing sa atubangan sa Dios.

¹⁹⁴ Tukma gayud kini sa niining panahon, kung unsa ang gisulti Niya nga Iyang pagabuhaton, “Ug maingon sa nahitabo kaniadto sa mga adlaw sa Sodoma, mao man usab ang mahitabo sa pag-abot sa Anak sa tawo, sa diha nga ang Anak sa tawo mapadayag na.” Kita n’yo? “Ug, ania karon, Akong ipadala kaninyo si Elias nga propeta sa dili pa moabot ang daku ug makalilising nga adlaw sa Ginoo. Iyang ipasig-uli ang mga kasingkasing sa mga anak balik ngadto sa Amahan.” Kita n’yo? Kita n’yo?

¹⁹⁵ “Ug unya ang mga matarung magalakaw ibabaw sa—sa sa abo, sa mga dautan.” Sila mangasunog sama sa hudno, kita n’yo, mamaingon niini ang kalibutan. Makita nato kini nga mahulog didto. Ug ang mga nagagawas sa bulkan mokuyanap sa tibuok kalibutan, ug magakalayo ang kalangitan.

Oh Bato sa mga Kapanahonan, kaloy-i ako karon, ug nianang panahona.

¹⁹⁶ Kumusta ka? Bueno, ang usa ka butang, aduna ka’y sakit nga iya sa babaye, sakit pang-babaye. Adunay uban pa. Aduna ka’y nerbiyos, tungod kana sa pangidaron nga magkaaduna ta og nerbiyos. Tanan na nga matang sa mga komplikasyon. Apan aduna ka’y tinguha, usab, kana’y ang madawat ang Espiritu Santo. Husto. Mao kana mismo. Nagatoo ka ba nga ikaw’y. . . gisugid mo na ba ang tanan-tanan? Nagatoo ka ba nga kung pandongan ko ikaw og mga kamot ug hangyoon ang Dios nga buhaton kini, nga moabot ang Espiritu Santo? [Nagaingon ang igsoong babaye, “Oo.”—Ed.] Nagatoo ka ba niana? [“Oo, sir.”] Mag-ampo kita.

¹⁹⁷ Minahal nga Dios, ginapandong ko ang akong mga kamot nganhi niining bababye, sa apostolikanhong paagi, ug nagapangamuyo ko nga iyang madawat ang bautismo sa Espiritu Santo. Sa Ngalan ni Jesus Cristo, hinaut nga madawat niya Kini. Amen.

¹⁹⁸ Ayaw pagduhaduha niini. Panag-iya n’yo Kini, kita n’yo. Inyoha Kini. Kini mao ang—ang Tinapay sa mga anak.

¹⁹⁹ Aduna ka’y medyo dili-masabot nga pagbati sa pag-ingon ko, “sakit pang-babaye,” dili ba? Tungod kay aduna man ka niana, usab. Karon, nagatoo ka ba nga mamaayo ka na karon? Lakaw na, og pasalamat gayud ang Ginoo.

²⁰⁰ Kumusta ka? Nagatoo ka ba sa tibuok mong kasingkasing? Nagatoo ka ba nga mahimo ka na nga mokaon nga sama sa naandan mo sa dugay na nga panahon? Sige. Lakaw na, ug moingon, “Salamat Kanimo, Ginoo. Nagatoo ko niini.” Ang Presensiya sa Ginoo.

²⁰¹ Nagatoo ka ba nga mobiya na kanimo kanang sakit sa likod ug mamaayo ka na? Sige. Lakaw na, nga nagaingon, “Salamat Kanimo, minahal nga Dios,” ug itugot kini sa Dios.

202 Nagatoo ka ba nga mahimo kang mamaayo, ayohon ka na sa Ginoo, ug wala na'y arthritis, mamaayo na ug mahimsog na? Nagatoo ka ba niana? Lakaw na, nga nagapasalamat Kaniya, moingon, "Ginoo, ginadawat ko kini sa tibuok kong kasingkasing, ug nagatoo ako niini."

Kamong tanan dinha unsa ma'y ginatooan n'yo mahitungod Niini?

203 Ikaw nga anaa dinhi mismo, ipandong ang imong kamot diha nianang babaye nga nagalingkod dinha tupad nimo, sultihi siya nga mobiya na kaniya ang barikos sa ugat ug arthritis. Pag siya . . . ? . . .

204 Panalanginan ka sa Dios. Nagatoo ka ba nga mamaayo ka na karon? Pauli na ug mamaayo na. Panalanginan ka sa Dios. Lakaw na, ug moingon, "Salamat Kanimo, Ginoong Jesus."

205 Kumusta ka? Nagatoo ka ba nga mobiya na kanimo ang sakit pang-babaye, usab, ug mamaayo ka na? Lakaw na, ug moingon, "Salamat Kanimo, Ginoo."

206 Kumusta ka? [Nagaingon ang igsoong babaye, "Napudpod ang lutahan sa akong bukog."—Ed.] Aba, grabe, grabe! ["Totten."] Kabalo man ko sa imong ngalan. Ako—ako kaniadto . . . ["Totten."] kaniadtong nagpastor pa ko sa iglesiang Baptist. ["Totten."] Totten. ["Della Totten."] Igsoong Della Totten. Naga-antus ka karon tungod sa sakit sa likod. ["Oo."] Mamahimong okey na ang tanan, karon. Nagatoo ka ba nga ayohon ka na Niya? Nahinumduman pa ba nimo ang nahitabo didto sa Milltown Baptist church pila na ka tuig ang milabay? ["Oo, nahinumdum pa ko niadto!"] Siya ang mao sa gihapon nga Dios karong panahona. Panalanginan ka sa Dios, igsoon kong babaye.

George Wright, asa man ka? Nahinumduman mo ba? My, daw sa unsa . . .

Nagatoo ka ba, nga kung ipandong ko lang ang akong mga kamot diha kanimo, uban niining pangdihog, nagatoo ka ba nga mamaayo ka na? Duol ngari. Sa Ngalan ni Jesus Cristo hinaut nga mamaayo na siya. Amen. Magmaaduna og pagtoo!

Bueno, nagatoo ba kamong tanan sa tibuok n'yong kasingkasing?

207 Karon, ginapabalik niini ang mga karaang handumanan, ang makita ang maong babaye! Dili ko lang madumduman ang iyang ngalan, bisan pa man, apan ako . . . [Adunay nagaingon, "Totten."—Ed.] Totten. Totten, husto kana. Oh, oo, iyang anak si Bertie. Husto kana. Eksakto kana. Ayaw n'yo hunahunaa nga nawala na ako sa akong kaugalingon, ako'y medyo, kabalo mo, medyo usa kini ka . . . dili ko maisaysay kini.

208 Apan nawala na ang imong sakit sa likod, gining. Lakaw na, dayega ang Ginoo, ug moingon, "Salamat Kanimo, Ginoo."

209 Nagatoo ka ba nga ang imong sakit sa kasingkasing mamahimong okey na, usab? Padayon lang, paglipay, ug moingon, “Salamat Kanimo, Ginoong Jesus,” ug toohi Kini. Sige. Magmaaduna og pagtoo karon. Ayaw pagduhaduha.

210 Ari ka, gining. Nagatoo ka ba sa tibuok mong kasingkasing? Daghang butang ang problema diha kanimo. Aduna ka’y sakit sa likod, usab. Nagatoo ka ba nga ayohon ka na sa Dios? Sige, padayon lang, nga nagakalipay. Kana, Siya kana nga nagapabati kanimo og ingon niana. Salamat sa Ginoo. Panalanginan ka sa Dios, igsoon.

211 Kumusta, anak. Nagatoo ka ba nga ayohon sa Dios ang pagkanerbiyos nianang bata ug himoon nga mamaayo na? Nagatoo ka ba niini? Sige. Kumusta, higala, makiglamano sa ko kanimo.

212 Minahal nga Dios, tangtanga kanang dautang butang gikan niining batang lalaki, ug hinaut nga mabuhi siya ug mahimong normal na. Sa Ngalan ni Jesus. Amen.

213 Panalanginan ka sa Dios, igsoon. Nagatoo ka niana, dili ba? Mamahimong okey ka na. Ayaw pagduhaduha man lang.

214 Batan-on pa kaayo para magkaaduna og sakit sa kasingkasing. Nagatoo ka ba nga ayohon ka na sa Dios? Lakaw na, og moingon, “Salamat Kanimo, Ginoo, sa pag-ayo kanako.”

215 Nagatoo ka ba nga ayohon na sa Dios ang imong sakit sa tiyan ug himoon ka nga mamaayo na? Lakaw na, paglipay, ug moingon, “Salamat Kanimo, Ginoo.”

216 Siya’y Dios sa gihapon, dili Ba? Ang bugtong butang nga kinahanglan ninyong buhaton mao ang motoo lamang. Dili ba husto kana? Nagatoo ba kamo sa Anak sa tawo sa kaulahiing mga adlaw?

217 Adunay nahitabo dinhi kaganina lang, ug dili ko mahimong . . . ginapaningkamotan kong hibaloan kung asa kini. Adunay usa ka tawo nga nakabaton og pagtoo ug nakabuhat og usa ka butang. O, tingali mahibaloan ko ra kini sa sunod Dominggo, o pagmahimo ko na. Ikaw—ikaw ba . . . Anaa na usab kini. Gipataas mo ang imong kamot. Nagatoo ka ba nga mahimo sa Dios nga ayohon kanang sakit sa kasingkasing, himoon ka nga mamaayo na, og ayohon ang imong anak nga babaye didto nga ma’y—ma’y . . . Nagatoo ka ba niini? Mrs. Neff, nagatoo ka ba nga ang Dios . . . Leo Neff. Wala ko makaila kanimo, pero mao kana kung kinsa ka. Aduna ka’y sakit sa kasingkasing, ug ang imong batang babaye adunay sakit sa kidney. Nagatoo ka ba nga mamaayo na siya? Ang imong pagtoo ang nakapaayo kanimo. Tumoo ka sa tibuok mong kasingkasing.

218 Ikaw nga anaa dinha sa ma’y bautismohan, nagatindog dinha nga ma’y sakit sa tiyan, giayo ka na ni Jesus Cristo.

219 Nagatoo ba kamo? Siya mao sa gihapon kagahapon, karon, ug hangtud sa kahangturan. Atong ipandong ang atong mga kamot sa usa'g usa karon. Oh, palandunga n'yo ang takna nga atong gikahimutangan, palandunga n'yo ang panahon. Hunahunaa n'yo nga anaa kita sa mismong Presensiya ni Jesus Cristo, ang Anak sa Dios. Nagsaad Siya nga pagabuhaton Niya kini sa kaulahiang mga adlaw. Ginapandong ko ang akong mga kamot sa niining mga panyo.

220 Minahal nga Dios, ginaampo ko nga panalanginan Mo kining mga panyo alang sa kaayohan sa mga lawas sa mga tawo, pinaagi sa Ngalan ni Jesus Cristo.

221 Karon, samtang nakapandong ang inyong mga kamot sa usa'g usa, ang matag usa kaninyo mga bahin man sa Lawas ni Cristo. Ang mao ra nga Balaang Espiritu nga nagsaad nga ipadayag ang mga tinago sa mga kasingkasing ug buhaton kini nga mga butang, Siya anaa kaninyo. Kabahin kamo Kaniya, ug Siya'y kabahin na usab ninyo. Karon, giingon Niya kini, "Kini nga mga ilhanan maganunot kanila nga nagatoo." Kamo kana. "Kung pandongan nila sa ilang mga kamot ang mga masakiton, mangaayo sila." Karon, ayaw pag-ampo alang sa inyong kaugalingon, kondili pag-ampo alang nianang usa nga gipandongan n'yo sa inyong mga kamot, tungod kay nagaampo man sila alang kaninyo. Karon dungan kitang mag-ampo, ug hinaut nga wala na'y usa ka tawong maluyahon dinhi niining bilding. Nganong maghulat pa man ta og dugay, minahal kong igsoong lalaki, igsoong babaye, ania na Kini, ang Balaang Espiritu, ang Dios, ania mismo, ang mismong Butang nga atong gihisgotan.

222 Minahal nga Jesus, ginaila namo ang Imong Presensiya. Gibuhi Mo pag-usab kadtong gamay'ng bata niadtong miaging adlaw, human nga patay na kini, pinaagi sa pag-ampo nga inubana'g pagtoo. Minahal nga Dios, daghan ang ania karon nga dili na namo maatiman, ingon nga wala na'y oras, apan ginapandong nila ang ilang mga kamot sa usa'g usa. Sila'y mga magtotoo. Ania kami mismo sa Presensiya ni Ginoong Jesus Cristo, nga nabanhaw gikan sa mga patay, ang mao sa gihapon kagahapon, karon, ug hangtud sa kahangturan.

223 Satanas, napildi ka na! Gipildi ka na ni Jesus Cristo! Nabanhaw Siya gikan sa mga patay ug ania mismo uban kanamo karong gabhiona, nga ginapanghimatud-an kining Mensahe sa kaulahiang mga adlaw. Gumula ka niini nga mga tawo! Bumiya ka kanila, sa Ngalan ni Jesus Cristo! "Sa Akong Ngalan pagahinginlan nila ang mga yawa," ug gihinginlan ka na. Sa Ngalan ni Jesus Cristo, bumiya ka niining kongregasyon!

224 Ang matag usa sa inyo karon nga nagadawat na sa inyong kaayohan, tindog mo. Ang tanan nga nagadawat na og

kaayohan, tindog na mo. Ipataas n'yo ang inyong mga kamot karon ug dayega ninyo Siya!

“Ginadawat ko na karon ang akong kaayohan,” isulti n'yo kana sa Dios. “Ginadawat ko na karon ang akong kaayohan. Ikaw ang mao sa gihapon kagahapon, karon, ug hangtud sa kahangturan, ang Cristo. Nagatoo na ako karon Kanimo, tabangan Mo unta ang akong pagkadili-matinoohon. Amen.”

I will praise Him, I will praise Him,
Praise the Lamb for sinners slain;
Give Him glory, all ye people,
For His Blood has washed away each stain.

²²⁵ Di ba ginahigugma man ninyo Siya? [Nagaingon ang kongregasyon, “Amen.”—Ed.] Dayegon nato Siya kung ingon-ana. Ang tanan, samtang nakataas ang inyong mga kamot, dayega ninyo Siya, samtang nagaduol dinhi ang igsoong lalaki aron ipapauli na kita. 🐦

65-0718E Espirituhanong Pagkaon Sa Gikatakda Nga Panahon
Branham Tabernacle
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org